

Me Ebereu Yai Leta

Buki Taina Wayahina

Nonova tomotau habuhabui ivitumahanei leta taina a tau ginuma vivane Paulo. Aituhu buki taina mataina 13:23-24 kana-iavi, kavaniahei leta taina a tau ginuma Timoti anamanei, ka ainua nui ini-keyekeyei. Ka kadueyei leta taina a tau ginuma papani Itali nihenina ginumi, ka va-tawanei omo mani papani wayahina.

Buki taina a tau ginuma ya nuanua me Iudea yai vitumahana (*Awaeha Tutuaina* wayahina) ka tau ekalesia yai vitumahana Iesu wayahina (*Awaeha Vovouna* wayahina) ainua ibou-viwavei. Ka aituhu ibou-viwavei deina, memeanina tomotau habuhabui idueyei *Awaeha Vovouna* ahi-ahina, ka vane-tawanei. Wayahina, buki taina a tau ginuma dewa tunina tunina awaeha ainua nihenia bou-viwavei wayahi, ka tuta aitamoata aitamoata *Awaeha Vovouna* vane-tawanei.

Pai mini ananina buki taina a tau ginuma wayahina vivane vitumahana. Tauna viwaveneka vitumahana vivane dewa ananina awaeha ainua nihenia. Ka upwa 11 nihenina tau ginuma taina tomotau nonova imamaei ai wava habuhabui tomatomani, ka aitamoata aitamoata wayahia yai vitumahana mamaei.

Ka yaka pai dune dewa habuhabui wayahi vivane Iesu Tau Ito-yavuha. Ka nau-wawanika tauna kavi-muni-waiwaiei.

Yaubada Yana Vona Omo Wayahikaia Natuna Wayahina

¹ Nonova etawana habuhabui wayahia kadu tuta habuhabui wayahia Yaubada tauna yana vona tau apa-taputapu veneveni, e tau ihaehaeyei itoka me Ebereu yaka tupua-nenenehi wayahia.

² Ka tuta pai nau-yehata taina wayahina, vivane itoka yaka tutea, Yaubada avaha yana vona Natuna onotona wayahina haeye-neiei wayahikaia. Ka Yaubada tauna Natu-nana vi-nua-dadanei kadu awaehei tauna vi-tau veimea dewa habuhabuna wayahina. Ka tuta naona wayahina Yaubada tauna Natuna nui dewa habuhabui ivevewane-neiei.✧ ³ Ka Natu-nana tauna Amana didigana a maheta, ka kadu tauna vivane Yaubada yawaina a ito-vi-tamana. Wayahina, tauna ana pata Yaubada na-viwaveneka. Ka dewa habuhabuna wahuma kadu dewa habuhabuna tanopia yai bagibagi ivaniahei tauna yana vona bagibagina wayahina. Ka tauna, avaha yaka goyo-naia wayahia vo-vi-hadanika, e ivane wahuma ka Yaubada Heta-hoina ateina manuenta.✧

Yaubada Natuna Anelose Habuhabui Vane-tawane-neiei

⁴ Dewana wayahina kadueyei Yaubada Natuna anelose habuhabui vane-tawane-neiei, kadu tauna ana wawa anelose ai wawa vane-tawane-neiei aitamoata deina. Iuna tauna ana wawa vaniahei Amana wayahina.✧ ⁵ Iuna eha aitam tuta wayahina Yaubada aitam anelose wayahina ta-vona,

✧ **1:2:** Ioni 1:3. ✧ **1:3:** Ioni 14:9; Kol 1:20; Ebe 8:1. ✧ **1:4:** Pili 2:9.

“Wamke natu.
Ataina tuta wayahina avona,
‘Amam Yauke Taua’ ”.

ka kadu aitam vona Iginuma nihenina ivona,

“Apaina in'-anamanei,
Yauke tauna Amana,
kadu tauna Natu,”

ka Yaubada vonana Natuna ana heta voneyei,
tauna eha aitam anelose ta-voneye.✧ ⁶ Ka kadu
tutana Yaubada tauna a unu-tau omanei tanopia,
e tupua, ivona,

“Yaubada yan' anelose habuhabui
nau-wawani tauna wayahina
ina-iwaodu”.✧

⁷ Ka tutana Yaubada ipuipupu yan' anelose
wayahi, ivona,

“Yaubada tauna yan' anelose vevewane-neiei
vivane tau i yai nae yahina deina.
Kadu tau i ya tau paisewa,
ka tau i ai yabeyabena deina.”✧

⁸ Kate tutana Yaubada ipuipupu Natuna
wayahina, ivona,

“Wamke yam pai veimea ma'-vavaha, O Yaubada!

✧ **1:5:** Sam 2:7; Dew 13:33; 2Sa 7:14; 1Va 17:13. ✧ **1:6:** VV
32:43; Rom 8:29. ✧ **1:7:** Sam 104:4.

Yam tomotau eveimeyei tunutunuhina.✧

9 Wamke yam nuanua ananina
 dewa tunutunuhina,
 ka kadu dewa goyona
 enau-nikonikoiei, evihahaiei.
 Wayahina, Yaubada, vivane yam Yaubada,
 avaha vi-nua-dadanem,
 kadu awaehem edewa-haiawa ananina.
 Iuna tauna didigam venem,
 ka didigamna yaiam didigai
 vane-tawane-neiei.”

10 Ka Yaubada tauna Natuna wayahina kadu
 ivona,

“Wamke, Kauvea, tuta naona wayahina
 tanopi evevewanei
 ka nimama wahuma epaisewei.✧

11 Apaina ainuai ina-iakwa,
 kate wamke ema'-vavaha,
 ainuai apaina tutuaina,
 kwama si-yehiyehitana deinake.

12 Ka apaina wamke dewaia enunumi
 kwama mamanaina deina,
 ka evo-vinei am kwama vovouna
 deinake.
 Ka tuta tuta wamke eha eta-vo-vinevine,
 kate ema'-vavaha, yawaim eha na-iakwa.”

13 Vona ahiahina, eha aitam tuta wayahina
 Yaubada aitam yan' anelose wayahina ta-vona,

“Baina ateiuwa emanuena

✧ 1:8: Sam 45:6-7. ✧ 1:10: Sam 102:25-27.

a itoava am havia aem debakunia abouni,
vivane aem a pai vi-ai wayahina.”✧

14 Wayahina, aviani kana-vona anelose wayahi? Tau vivane nua, ka tau Yaubada ya tau paisewa. Ka kadu tauna vi-tunei iomomo itoka tomotau wayahikaia iaivaiteka, iuna Yaubada ya nuanua ito-yavuha kavaniahei.✧

2

Yaka Ito-yavuha Ahihi-vainena

1 Pai mini-naia habuhabui nua-uya ananina. Wayahina, nau-wawanika Yaubada ya vonaia tunutunuhina avaha kanononi-neiei kanua-vi-anai, ka eha kavi-nua-pani-neie, ka eha anunueka. 2 Tuta nonova wayahina anelose Yaubada yana vona ihaehaeyei tomotau wayahia, ka tau vonaia inononi nau-wawani idedewei, vivane ai veimea. Ka aituhu aviyaivia vonaia ivihahaiei, itana-bwegei, akanai tau ai dewa-yaiyai ivaniahei dewaia goyona wayahi.✧ 3 Ka tuta ataina wayahina itoka nau-wawanika Yaubada yana vona kanononi, kadedewei aitamoata deina. Aituhu tuta ataina wayahina ito-yavuha ahihi-vainena Yaubada wayahina kavihahaiei, vona ahiahina, apaina dewa-yaiyai ani-vainena kavaniahei. Eha aka pata dewa-yaiyaina kana-novo-tawanei.

Naona Kauvea Iesu ito-yavuhana tauna a tau hae-naia anani mataedai, inononi. E tau iviwaveneka ito-yavuhana vivane vona

✧ **1:13:** Sam 110:1. ✧ **1:14:** Sam 34:7; 91:11. ✧ **2:2:** Gal 3:19.

tunutunuhina ana noe.✠ 4 Ka Yaubada kadu haeyeka vonaia vona ahiahina, iuna tauna iaiaya, kadu pai nua vi-tupatupa, ka kadu dewa-bagibagi habuhabui dedewei. Ka kadu tauna am-venena-kavovo tunina tunina tomotau veneveni. Ka am-venena-kavovo-naia iomomo Nuana Ahihinata wayahina, aitamoata aitamoata Yaubada ya nuanua deina.✠

Tauna Eta-naoeka Ito-yavuha Wayahina

5 Apaina Yaubada tanopi vovouna na-vevewanei, ka tanopina a tau veimea vivane Tau Ito-yavuha. Ka Yaubada eha anelose t'-awaehe tanopina vovouna na-omo iveimeye. 6 Ka aitam vona Iginuma nihenina mamaei, ka tau ipupu Yaubada wayahina ipuipupu, ka ivona,

“Itoai tomotau aviani?

Ka aviani wayahina enuanua wayahiai?✠

7 Iuna naona itoai tomotau evevewaneai

ka ama wava tupwana kikituna,

ka anelose evevewanei

ka tau ai wava tupwana ananina.

Ka yam nuanua munia itoai didigai

kadu ama apa-vidovidoha eveneai avania-hei,

8 ka kadu yam nuanua

yam vevewana habuhabuna aveimeyei!”

Udueyei. Iginumana ivona “vevewana habuhabuna aveimeyei”, wayahina kan'-anamanei Yaubada ya nuanua “dewa

✠ 2:3: Ebe 10:29; 12:25. ✠ 2:4: Mar 16:20; 1Ko 12:4, 11. ✠ 2:6: Sam 8:4-6.

habuhabuna”. Kate ataina tuta wayahina, eha kata-dueye deina. Iuna tuta ataina wayahina itoka tomotau eha dewa habuhabuna kata-veimeye. ⁹ Ataina tuta wayahina medeina kadueye? Tuta ataina wayahina Iesu kadudueyei. Tuta nonova wayahina tauna vi-tomotau, e tauna ana dune tupwana kikituna tanopia, ka anelose ai dune tupwana ananina wahuma deina. Dewana vin^l-omo, iuna Yaubada ya nuanua tomotau habuhabuka am-venena awawaehina kavaniahei. Wayahina, Iesu aniga yaka goyona wayahi. Ka tuta ataina wayahina tauna kadudueyei avaha didigana kadu an^l apa-vidovidoha vaniahei. Akanai deina, iuna tauna aniga habuhabuka wayahika. Wayahina, tauna nau-wawani vi-tau veimea deina.✧
¹⁰ Yaubada dewa habuhabuna vevewanei, kadu imamaei iuna ya nuanua imamaei deina. Ka kadu Yaubada ya nuanua natunatuna habuhabuka didigaka kavaniahei. Wayahina, tauna matana Iesu nau-wawani inahe ananina vaniahei, toha-vi-anai, e vo-vi-aiaiei deina, e tauna itoka tomotau yawaika n^l-anamane-yehai. Iakwa, tauna ana pata na-eta-naoeka ito-yavuha kavaniahei deina. ¹¹ Iesu ya paisewa wayahina itoka tomotau kavi-tau ahihikata Yaubada matana, ka Iesu nui kavi-yoko aitamoata, vivane Yaubada yana yoko. Wayahina, Iesu awaeheka itoka tauna taitaina, ka tauna eha na-ini-yauyau wayahika.✧ ¹² Ka Iesu yana vona kavaniahei Iginuma nihenina, ivona,

✧ 2:9: Pili 2:8-9. ✧ 2:11: Mat 25:40.

“Am wava vavaneiu amataedai,
avaha inau-hohona yau ahe wayahina
an'-awa-davem mataia.”✧

13 Ka kadu vona Iginuma nihenina ivona,

“Tauna avitumahanei.”

ka kadu

“Baina amamaei, yauke taua
kadu natunatu nui, taui Yaubada veneu.”✧

14-15 Itoka natunatuna na vioka kadu na dayahika. Wayahina, tauna vi-tomotau itoka deinake. Akaka yan' aniga wayahina Iesu Satana vita-vovoni. Nonova Satana aniga a papani veimeyei, ka tauna yohonika tau paisewa-kavokavovo deina, iuna habuhabuka nau-wawanika papani-nana kana-omoi. Kate tuta ataina wayahina Satana ya veimea iakwa. Wayahina, ataina aka pata kavi-nua-dadani matautana kani-tawanei.✧ 16 Vona ahiahina, Tau Ito-yavuha eha anelose ta-ito-yavuhi, kate tauna itoka Abaraham ya tupua-nenenehi ito-yavuhika. 17 Wayahina, tauna nau-wawani vi-tomotau itoka taitaina deina. Iakwa, e tauna anamane-yehai, ka ana pata n'-ate-nuanuaieka, kadu vi-tau vi-nomu ananina, kadu paisewa tunuhina Yaubada wayahina. Ka kadu tauna vivane itoka yaka dewa goyona habuhabui ai nau-pata, e tauna Yaubada nau-pateyei, e

✧ 2:12: Sam 22:22. ✧ 2:13: Isa 8:17-18. ✧ 2:14-15: 1Io 3:8; SiV 12:10.

Yaubada na-nua-piahika. ¹⁸ Vona ahiahina, Iesu vi-tomotau tanopia, ka Satana nau-dadani tuta habuhabui wayahia, ka tuta-naia nihenia Iesu inahe ananina vaniahei. Wayahina, tauna aka nau-dadana anamane-yehai. Wayahina, aituhu avi tuta nau-dadana kavaniahei, tauna ana pata na-ivaiteka.

3

Iesu Kadu Mosese Vane-tawanei

¹ Wayahina, itomi nau-wawanimi Iesu wayahina unua-vi-anai. Vavaneiu Tau Ito-yavuha nihenina, itomi ahihimiata, kadu Yaubada avaha vi-nua-dadaneka, kadu honeka ya papani na-vo-pataka. Iesu kanua-vi-avini kadu kahaehaeyei, iuna tauna yaka vitumahana a tau hae, kadu yaka tau vi-nomu ananina.*

² Yaubada vi-nua-dadanei vi-tau hae kadu vi-tau vi-nomu, ka aviani nau-wawani paisewana wayahina, akanai Iesu dedewei tunutunuhina ana noe, eha aitam aviani ta-vo-haini, tuta nonova Mosese ya paisewa Yaubada ya manua nihenina^a aitamoata deina.

³ Kate Iesu an' awa-vidovidoha Mosese an' awa-vidovidoha vane-tawanei. Vonana vona tunuhina, iuna tau yona manua nau-wawani an' awa-vidovidoha manua ana heta an'

* **3:1:** Ebe 4:14; 7:26; Yau 12:7. **a 3:2:** Buki taina a tau ginuma vona baimina tomatamani upwa 3 nihenina. Tuta nonova, Mosese ya tutea, me Isiraeli eha aitam manua ita-yone Yaubada wayahina. Ana heta Ine Vito-pota wayahia. Ka munia, Solomoni ya tutea nihenina, Manua Vito-pota iyonei. Wayahina, vonaia Yaubada ya manua nihenina an' anamana Yaubada ya tomotau wayahia.

awa-vidovidoha vane-tawanei aitamoata deina.
⁴ Vona ahiahina, manua aitamoata aitamoata ai tau yona manua imamaei. Kate unononi, dewa habuhabui ai tau yona vivane Yaubada.
⁵ Ka Mosese ya tutea, tauna tau paisewa ahiahina Yaubada ya manua nihenina, ka aituhu avi apa-taputapu Yaubada wayahina iomomo, akanai Mosese vonaia apa-taputapuei tunuhina.✧ ⁶ Kate Tau Ito-yavuha yana dewa Yaubada ya manua wayahina Mosese yana dewa vane-tawanei. Iuna tauna yana dewa eha tau paisewa yana dewa deina. Eha. Tau Ito-yavuha yana dewa Amana natuna tupu-keana deina, vivane tuta munia, manuana tauna ya manua. Ka manuana vivane itoka tau ekalesia, aituhu yaka ate-vatu kanua-vi-avini, kadu aituhu yaka nua-vaniaha nui kapotapota a itoava Yaubada ya vona-dabadabana kavaniahei wayahina.

Vi-yawai Yaubada Ya Tomotau Wayahi

⁷ Ka tuta nonova wayahina Nuana Ahihinata yana vona Iginuma nihenina ivona,

“Ataina, aituhu Yaubada movina unononi,✧

⁸ eha ununumi uvi-toyoa

yami tupua-nenenehi yai dewa deina.

Tuta nonova wayahina udana nihenina

ivihahaieu, kadu inau-dadaniu.✧

⁹ Yaubada ivona, ‘Ponimana ai yau 40 nihenia

yau dewa-bagibagi habuhabui

idudueyei ianamanei,

kate idewa-dadaniu.

✧ **3:5:** Yau 12:7; VV 18:15-19. ✧ **3:7:** Sam 95:7-11. ✧ **3:8:** NiT 17:7; Yau 20:2-5.

- 10 Wayahina, anua-goyo kadu amaga-bawe ananina
yami tupua-nenenehi wayahi.
Ka avona, “Tuta habuhabuna wayahia
tomotau taina yai nuanua ini-tupatupa,
ka kadu tau yau nuanua wayahi ivihahaiei.”
- 11 Wayahina, yau nua-goyo wayahina
avona-dabadaba, avona,
“Tomotau taina avito-potai.
Eha an¹-awaehe
yau papani vi-yawai nihenina ina-nu!”
, ”✧

12 Yaiau, udune-vivinimi! Eha nau-wawanimi ununumi uvi-toyoo. Aituhu udedewei deina, apaina nuami goyogoyona na-eta-naoemi yami vitumahana uvo-haini, kadu Yaubada Yawayawaina uvihahaiei. 13 Eha yau nuanua goyona na-nonomi, e munia uvi-nua-toyoo. Wayahina, auyewa aitamoata aitamoata nihenina, itomi nau-wawanimi una-ivaitemi a itoava tuta ana wava “Ataina” Yaubada venevenemi na-iakwa wayahina. 14 Avonavona deina, iuna nonova Tau Ito-yavuha kavitumahanei. Ka aituhu yaka vitumahana kanua-vi-avini a itoava tuta pai nau-yehata wayahina, akanai, tuta-nana wayahina Tau Ito-yavuha ya gugua wahuma kavopatai. 15 Iginuma nihenina, ivona,

“Ataina, aituhu Yaubada movina unononi,
eha ununumi uvi-toyoo

✧ 3:11: Yau 14:21-23.

yami tupua-nenenehi yai dewa deina.
Tuta nonova wayahina udana nihenina
ivihahaieu, kadu idewa-dadaniu.”✧

16 Avi tomotau Yaubada yana vona inononi, kate munia ivihahaiei? Tauivivane me Isiraeli habuhabui Mosese papani Egipita wayahina eta-naoei iopu-me.✧ 17 Ka avi tomotau yai dewa wayahi Yaubada maga-bawei ponimana ai yau 40 nihenia? Tauivivane me Isiraeli habuhabui, ka dewa goyona idedewei anata, ka tenoke ianianiga.✧ 18 Ka avi tomotau wayahia Yaubada vona-dabadaba, ivona, “Tomotau taina avito-potai. Eha an'-awaehe yau papani vi-yawai wayahina ina-nu!”? Tauivivane me Isiraeli habuhabui eha yana vona ita-vi-ateteye. 19 Wayahina kadueyei, kan'-anamanei tauivivane eha ai pata ina-nu, iuna tauivivane eha yai vitumahana.

4

Vi-yawai Ainua Wayahi

1 Yaubada ya vona-dabadabana tutuaina mamaei a itoava “Ataina” na-iakwa wayahina, ka vona-dabadabana ya nuanua tutuaina viwaveneka. Tauna ya nuanua ya tomotau vi-yawai a papani ina-nu ima'-vavaha. Wayahina, itoka habuhabuka nau-wawanika kadune-vivinika. Iuna yau nuanua vivane eha aitam wayahimia una-peu, uvi-kutakuta, o vi-yawai-nana ututu-haini. 2 Vona ahiahina, itoka habuhabuka avaha Vaneana Ahiahina kanononi,

✧ 3:15: Ebe 3:7-8. ✧ 3:16: Yau 14:1-35. ✧ 3:17: 1Ko 10:10.

tomotau nonova ianiga anata nihenina deina. Kate vaneana inononi eha ta-ivaite. Iuna tau eha ita-vitumahane. ³ Ka itoka habuhabuka avaha Vaneana Ahiahina kavitumahanei, ka aka pata vi-yawai-nana kanuinu, kavaniahei. Kate tau tuta nonova wayahina eha ita-vaniahe. Ka tau wayahi Yaubada ivona,

“Wayahina, yau nua-goyo nui
avona-dabadaba, avona,
“Tomotau taina avito-potai.
Eha an'-awaehe
yau papani vi-yawai nihenina ina-nu!”

Ka avaha kanamanei, Yaubada tauna ya vi-yawai wahuma nihenina vi-putu tuta nonova wayahina, tutana ya vevewana habuhabui nau-yehai wayahina. ⁴ Ka Iginuma voneka Yaubada ipupu auyewana wayahina deina, ivona,

“Auyewa vi-7-na wayahina
Yaubada tauna ya vi-yawai
ya vevewana habuhabui wayahia
vi-putu.”⁵

⁵ Ka kadu kanuanua vonaia avaha atomani ivona,

“Eha an'-awaehe
yau papani vi-yawai nihenina ina-nu!”⁶

³ 4:3: Sam 95:11; Ebe 3:11. ⁴ 4:4: Nao 2:2. ⁵ 4:5: Sam 95:11.

⁶ Wayahina kadueyei, aitam vi-yawai mamaei wahuma, ka Yaubada ya nuanua vi-yawai-nana wayahina kadu mamaei. Tauna ya nuanua natunatuna vi-yawai-nana ivaniahei. Kate to-motau Vaneana Ahiahina inononi tuta nonova wayahina ivihahaiei, ka eha ita-vi-ateteye. Akaka tau i eha vi-yawai-nana ita-nu. ⁷ Ka yaka tupua-nenenehi yai dewaia iakwa, ka ponimana habuhabui munia, Yaubada yana vona omo Davida wayahina. Ka vonana avaha atomani, ivona,

“Ataina, aituhu Yaubada movina unononi,
 eha ununumi uvi-toyoa
 yami tupua-nenenehi yai dewa deina.”

Wayahina kadueyei, Yaubada kadu aitam auyewa boui, ka vi-wahani “Ataina”.✧

⁸ Unononi. Vi-yawai ainua mamaei. Tuta nonova wayahina Iosua me Isiraeli tupwai eta-naoi yai tano inuinu, e ivi-yawai yai nae anata wayahina. Vi-yawaina vivane vi-yawai tanopia. Kate ponimana habuhabui munia, Davida yan' apa-taputapu nihenina Yaubada ipupu kadu aitam vi-yawai wayahina. Ka vi-yawai-nana vivane vi-yawai wahuma.✧ ⁹ Wayahina, aitam vi-yawai mamaei Yaubada ya tomotau wayahi, ka vi-yawai-nana Yaubada ya vi-yawai auyewa vi-7-na wayahina aitamoata deina. ¹⁰ Ka aituhu aviyaivia vi-yawai-nana ivaniahei, itoka tauka deina, tau i yai paisewa wayahi ivi-yawai, Yaubada tuta nonova wayahina ya paisewa

✧ 4:7: Sam 95:7-8. ✧ 4:8: VV 31:7; Ios 22:4.

wayahina vi-yawai deina.✧ 11 Wayahina, itoka nau-wawanika kadewa-dadani vi-yawai-nana wahuma kavaniahei. Iuna tuta nonova wayahina tau anata nihenina eha ita-vi-ateteye. Wayahina, vi-yawai-nana itutu-haini. Kate eha yaka nuanua katutu-haini deina, a?

12 Wayahina nau-wawanika kagwagwaheyei vivane vi-yawai-nana kana-nui. Iuna Yaubada yana vona vivane yawayawaina kadu bagibagina. Ka aitam pai dune avenemi. Inama manimaninina ana pata ininika na-daba-kwayavoni. Ka Yaubada yana vona nuaka dabedabei deina, ka nau-yanahika nihenikaia, ka kadu nuaka ka ininika ainua tana-vewavewani, ka kadu yaka dewa hivahivana ai tana-vewana viwaveneka tunutunuhina o kadi goyogoyona.✧ 13 Eha aitam dewa ana pata Yaubada matana wayahina na-maiova. Kate dewa habuhabui vuvunaha-ohota imamaei Tauna matana wayahina, e Tauna anamane-yehai. Ka tuta a pai nau-yehata wayahina, nau-wawanika Tauna ya vi-tanai yawaika wayahi kavona-nau-patai.

Iesu Tau Vi-nomu Anani Habuhabui Vane-tawane-neiei

14 Wayahina, nau-wawanika yaka vitumahana kahaehaeyei kadu kanua-vi-anai. Iuna yaka Tau Vi-nomu Ananina mamaei, vivane Iesu, Yaubada Natu-hoina. Ka tauna avaha ivane wahuma wayahika, ka kadu tuta ataina wayahina tauna Yaubada matana mamaei

✧ 4:10: Ebe 4:4. ✧ 4:12: Epe 6:17; SiV 1:16; 19:13-15.

na-ivaiteka.✠ ¹⁵ Ka yaka Tau Vi-nomu Ananina yaka ihanua anamane-yehai. Tauna eha aitam tuta goyona ta-dewe, kate tutana tanopia mamaei, tauna avaha goyona ai nau-dadana aitamoata aitamoata ayaunei, itoka tomotau deinake. Wayahina, tauna ana pata n'-ate-nuanuaieka. ¹⁶ Akaka nau-wawanika yaka ate-vatu wayahina Yaubada kaviamei am-venena awawaehina na-veneka. Ka aituhu avi tuta kavi-kutakuta, aka pata tauna wayahina ate-nuanuai kadu am-venena awawaehina kavaniahehi, na-ivaiteka.✠

5

¹ Me Isiraeli yai tau vi-nomu ananina aitamoata aitamoata vivane tomotauata, ka nonova Yaubada vi-nua-dadane-neiei, e tau i ya tau paisewa, e ivi-tau nau-seana tomotau wayahi tauna matana. Ka tau i tomotau yai am-venena Yaubada wayahina ivi-nomu-havihavinei, ka tomotau yai dewa goyona niunena iveneveni. ² Ka aituhu aviyaivia mwagemwagei ini-tupatupa, yai tau vi-nomuia ai pata tomotau i dewa-bigei. Ka tau vi-nomuia ai pata paisewana wayahina, iuna tau i yai ihanua mamaei ianamanei. ³ Tau i iihanua. Wayahina, nau-wawani naona tau i yai dewa goyona wayahi niunena iveneveni, e munia ai pata mani tomotau yai dewa goyona wayahi niunena iveneveni.✠ ⁴ Eha ana pata aitam onoto vi-tau vi-nomu ananina iuna tauna ya nuanua vi-tau vi-nomu ananina. Eha-ohota.

✠ **4:14:** Ebe 3:1; 10:23. ✠ **4:16:** Ebe 10:19. ✠ **5:3:** Lev 9:7; 16:6.

Aituhu avi onoto Yaubada ya nuanua pai apa-vidovidoha na-vaniahei, akanai Yaubada vi-nua-dadanei kadu honei paisewana wayahina. Tuta nonova Yaubada Aroni vi-nua-dadanei, e tauna vi-tau vi-nomu ananina naona deina.✠
⁵ Ka kadu Tau Ito-yavuha deina. Tauna ana heta eha ta-vi-nua-dadani vi-tau vi-nomu ananina, ka tauna ana heta eha ta-vi-nua-dadani pai apa-vidovidohana na-vaniahe. Eha. Yaubada tauna wayahina ivona,

“Wamke natu.
 Ataina tuta wayahina avona,
 ‘Amam Yauke Tau’.”✠

⁶ Ka kadu aitam vona Iginuma nihenina Yaubada vonei, ivona,

“Wamke evi-tau vi-nomu ma'-vavaha,
 Melikisedeki deina.”✠

⁷ Tutana Iesu tanopia mamaei, tauna yana tou wayahina kadu ya konua wayahina viana kadu hidahida Amana wayahina. Iuna Amana bagibagina, ka tauna ana pata na-ito-yavuhi aniga wayahina. Ka Iesu tau nua-opu, kadu tauna ya nuanua ananina Amana yana vona vi-munie'i tunuhina, e vi-ateteyei aitamoata deina. Wayahina, Yaubada vianaia vanevanenehei kadu hidahidaia nononi.✠ ⁸ Ka unononi. Iesu vivane Yaubada Natu-hoina, kate tauna itoka tomotau deina. Wayahina,

✠ 5:4: NiT 28:1. ✠ 5:5: Sam 2:7. ✠ 5:6: Sam 110:4; Ebe 6:20; 7:1. ✠ 5:7: Mat 26:36-46; Pili 2:6-8.

tauna nau-wawani ana inahe wayahina nua-uya vaniahei, ka nau-wawani toha-vi-anai kadu Yaubada vi-ateteyei. ⁹ Ka avaha ana inahe habuhabui vaniahei, inahe-naia ivo-vi-ai-ai-yehai, e tauna vi-Tau Ito-yavuha ma¹-vavaha. Ka aituhu aviyaivia tauna ivi-ateteyei, tau i to-yavuha ma¹-vavaha ivaniahei. ¹⁰ Ka kadu Yaubada Iesu vi-nua-dadanei, e tauna vi-tau vi-nomu ananina, Melikisedeki deina.

Vona Panina Vitumahana A Vihaihai Wayahina

¹¹ Dewaia wayahina vona habuhabui ima-maei, ka nuanuau ahaeyei wayahimia, kate eha memeanina, iuna ununumi toyoina. ¹² Ika. Tuta ataina wayahina nau-wawanimi ami pata mani tomotau uviwavene, kate itomi eha ami pata, iuna vitumahana wayahina itomi meameami deina. Wayahina, nau-wawaniu avi-putu-havine, e Yaubada Vaneana Ahiahina a pai vi-putu a vonaia tunutunuhina aviwavenemi. Ia! Tuta ataina wayahina Yaubada ya nuanua wayahimi vahitau uamam, kate eha ami pata. Itomi nau-wawanimi una-nunu. Ika. Yaubada ya nuanua tuta ataina wayahina itomi ami pata yana vona panina unononi, uvi-ateteye, kate eha ami pata. Itomi vona bigana ana heta ami pata.✧

¹³ Aituhu aviyaivia inununu, tevana deina, tau eha viwavenena dewa tunutunuhina wayahina it¹-anamane. ¹⁴ Kate aituhu aviyaivia ai pata vona panina ivi-ateteyei, tau vahitau a tau am deina. Tau ai pata dewa ahiahina ka dewa goyona ainua ibou-viwavei, ka kadu ai pata dewa ahiahina ivi-nua-dadani idedewei. Iuna tuta tuta dewa

✧ 5:12: 1Ko 3:1-3.

tunutunuhina idewa-nubunubui. Wayahina, tuta ataina wayahina ianamane-yehai.

6

¹ Viwavene-naia ai pai vi-putu Tau Ito-yavuha wayahina avaha unononi-yehai. Ka tuta ataina wayahina nau-wawanimi uvi-tau ekalesia ananimi, e viwavenena panina unononi uvi-putu uvi-ateteyei. Eha yau nuanua amavina dewa pai vi-putu wayahia aviwavene-havinemi. Viwavene-naia naona nau-wawanika avi dewa goyona nuaka inau-vi-anigi wayahia kanua-vinana, ka Yaubada kavitumahanei, ² ka bapitaiso ai viwavenena, ka tomotau tau eta-naonao nimai wayahia am-venena-kavovo ivaniahehi Nuana Ahihinata wayahina, ka tau aniga yai mini-havine, ka kadu nau-yanahi-vavaha, vivane goyona a nau-pata dewa-yaiyai-vavaha. Avaha viwavene-naia habuhabui unononi. ³ Ka aituhu Yaubada yama viana taina n'-awaehehi, akanai habuhabuka viwavene-naia naona wayahia kavanevane tau ekalesia anani yai nua-uya wayahia.

⁴⁻⁶ Nonova tupwai tomotau ivi-tau ekalesia, ka Yaubada avaha nuai tunu-mahetei, ka avaha am-venena-kavovo wahuma ivaniahehi, ka avaha Nuana Ahihinata ivaniahehi nuai nihenina, ka avaha Yaubada yana vona ianamana-dadani vivane ahiahina, ka kadu avaha Yaubada ya bagibagi inau-dadani ianamanei. Ka vevevana vovouna apaina na-omo, ka tomotau avaha vevevanana a bagibagi iayaunei. Ka aituhu aviyaivia tomotau-naia wayahia yai vitumahana

ivo-haini, ka aituhu imavina yai dewa tutu-aina wayahia, vona ahiahina, eha ana pata imagigino imavina inua-vinana-havine. Luna aituhu idewa-dadani deina, taui yai nuanua vi-vane Yaubada Natuna itutu-vi-nahenahe-havinei deina, ka aituhu idewe deina, tauna ini-yauyau vaniahe-havine tomotau mataia. Ka dewana eha ana pata.*

⁷ Vona tana-minikuna taina unononi. Tomotau tano deina. Tupwai tano ahiahina. Wei atuatuna, ka tanoia ibiga, e memeanina waipei itabotabo, e munia aikayo ana tuta wayahina tau baguna yai dewa-haiawa wayahina aniani habuhabuna iaikayo. Tanoia nau-iaiava ivaniahei Yaubada wayahina. ⁸ Kate tupwai tano goyona. Tanoia wayahina wetau kadu mata-duduna ai heta itabotabo, eha aniani. Tuta eha ani-hoina na-iakwa wayahina, Yaubada tanoia na-bwanatai, ka tuta pai nau-yehata wayahina na-haponei inu ai ananata nihenina. Tomotau tano ainua deina. Tupwai ahiahi, ka apaina nau-iaiava ivaniahei. Ka tupwai goyogoyoi, ka apaina dewa-yaiyai ivaniahei.*

⁹ Yaiai, adewa-vidovidohemi, ka yama vonana tunutunuhina, ka avitumahanemi itomi tomotau ahiahimi, kadu anuanua nau-iaiava uvaniahei, iuna itomi avaha Tau Ito-yavuha uanamanei. ¹⁰ Yaubada ya vi-nua-dadana kadu yana dewa eha bwagona, kate tunutunuhina ana noe. Wayahina, tuta tepakaia wayahina tauna eha yami dewaia ahiahi na-nua-pania, kadu eha yami dewa-vidovidoha tauna wayahina

* **6:4-6:** Mat 10:22; Ebe 10:26-27; 1Io 5:16. * **6:8:** Nao 3:17-18; Mat 13:7, 22.

na-nua-pania. Ka tuta nonova wayahina a itoava tuta ataina wayahina itomi yami dewaia wayahina mani tau ekalesia uviwavenei Yaubada udewa-vidovidohei.* ¹¹ Yama nuanua aitamoata aitamoata wayahimia ugwigwaheyei deina a itoava tuta pai nau-yehata wayahina. Aituhu udedewei deina, aviani ahiahina ataina yami nua-vaniaha nui upotepotei, akanai munia uvaniahei. ¹² Eha yama nuanua uapu-tonetonene, kate yama nuanua yami pai dune vivane tau vitumahana anani. Iuna yai vitumahana toyoina, kadu itoha-vi-anai a itoava dewa habuhabuna Yaubada avaha vona-dabadaba wayahikaia ivaniahei wayahina.

Memeanina Yaubada Ya Vona-dabadaba Kavitungahane

¹³ Nonova Yaubada vona-dabadaba Abaraham wayahina. Ka eha kadu aitam wava Yaubada ana wava ta-vane-tawane. Wayahina, Yaubada tauna ana heta a wavea vona-dabadaba wayahina.*

¹⁴ Ka ivona,

“Avona-dabadaba wayahima,
apaina anau-iaivam, kadu apaina
yam tupua-nenenehi ivi-habu-vainei.”

¹⁵ Ka Abaraham nau-wawani na-toha-vi-anai tupwana bana mamanaina wayahina a itoava Yaubada ya vona-dabadabana a vin'-omana wayahina. Ka munia, tauna aviani Yaubada vona-dabedabeyei vaniahei.

* **6:10:** Ebe 10:32-34. * **6:13:** Nao 22:16-17.

16 Ka aituhu avi tuta itoka tomotau yaka nuanua kavona-dabadaba, itoka yaka ihanua wayahina nau-wawanika vona v^l-inuana katamani hetana, e kadu aitam tomotau ana wava ananina wayahina katamani. Ka munia, tauna na-veimeyeka yaka vona-dabadaba kanau-yehai. Tauna bagibagina, ka munia eha n^l-awaeheka yaka vona kavihahaie. 17 Tutana Yaubada vona-dabadaba Abaraham wayahina, tauna ya nuanua tauⁱ munia iomomo pouna ivaniahei in^l-anamanei vivane apaina tauna eha vona-dabadaba-nana na-vo-vine kadu eha na-kweui. Vona-dabadabana ma^l-vavaha. Wayahina, Yaubada tauna ana wava tomani, iuna eha kadu aitam bagibagi tauna ya bagibagi ta-bagibagi-tawane. Ka tauna yana vona v^l-inuana bou hetana deina. 18 Ka eha ana pata Yaubada vitupu dewa ainua wayahi. Aitam dewa ya vona-dabadabana wayahina. Ka kadu aitam dewa yana vona v^l-inuana bou hetana wayahina. Ka itoka avaha tanopi a dewaia goyona wayahia kanovo-tawane. Wayahina, aka pata kan^l-omo Yaubada wayahina, e aka pata ya vona-dabadabana kavitumahanei, ka kadu nau-wawanika kan^l-ate-vatu toyoina.✧

19-20 Ka aituhu avi wa^l nomu eha, akanai eha ani-hoina n^l-anunuei. Akanai itoka tomotau deina. Ka itoka yaka vitumahana bagibagina kadu toyoina vivane yaka nomu deinake.

Yaubada aitam pai vi-ai boui itoka me Isiraeli yaka Manua Vito-pota nihenina. Ka papanina nihenina tau vi-nomu ananina pai vi-nomu

✧ 6:18: Yau 23:19.

dayahina wayahina inui, ka papanina vivane vito-potapotana. Wayahina, Yaubada veimeyeka pai bwa¹ kaboui na-kwaioyo, e papani-nana na-bwaei, ka tau vi-nomu eha papani-nana ni-henina ita-dune-kavokavovo. Ka Iesu avaha eta-naoeka, ka tauna papani-nana avaha inui wayahika. Ka tauna avaha vi-tau vi-nomu ananina ka ma¹-vavaha Melikisedeki nonova deinake. Wayahina, itoka yaka vitumahana nuaka nomui, kadu kanamanei Yaubada nui kama¹-vavaha.✧

7

Tau Vi-nomu Ana Wava Melikisedeki

¹ Ka Melikisedeki tanoi vivane onoto tuna. Tauna Salem ana kini^V kadu tauna Yaubada Heta-hoina ya tau vi-nomu aitam. Tuta nonova wayahina Abaraham kini^V tupwai nau-havi-neiei, ka avaha haviana ivane, tauna mavimavina ya megeia. Ka tutana etawana, Melikisedeki Abaraham vi-vaniahei, e nau-iaiavei yana vona wayahina.✧ ² Wayahina, Abaraham guguaia epei kini-naia^V wayahia tana-vewani gwau ai yau 10 wayahia, e gwau aitamoata Melikisedeki awaehei, iuna Melikisedeki vivane Yaubada ya tau vi-nomu. Ka nau-wawanika Melikisedeki ana wava a vo-vina ainua kanuanuani. A vo-vina naona vivane “Dewa Tunutunuhina Ana Kini^V”, kadu Salem ana Kini^V a vo-vina v¹-inuana vivane “Nua Gomagomanina Ana Kini^V”. ³ Ka Melikisedeki eha mani tomotau deina. Tauna eha amana kadu eha ayona, ka kadu eha aitam yana dede tanopia. Ka kadu eha ya tupua kadu eha yan¹ aniga. Wayahina,

✧ **6:19-20:** Lev 16:2-3. ✧ **7:1:** Nao 14:17-20.

tauna Yaubada Natu-hoina deina, iuna ainua tau vi-nomu ma¹-vavaha.

Melikisedeki Ana Wava Abaraham Ana Wava Vane-tawanei

⁴ Vona ahiahina, Melikisedeki tanoi ana wava ani-vainena. Udueyei. Waka Abaraham ana wava ananina, kate Abaraham awaehei Melikisedeki ana wava ani-vainena. Wayahina, tauna Melikisedeki a vo-pata venei guguaiia wayahia. ⁵ Ka tuta nonova wayahina aitam veimea Mosese ya veimea nihenina veimeyeka nau-wawanika yaka gugua katana-vewani gwau ai yau 10 wayahia, e Levi ya tupua-nenenehi ivi-tau vi-nomu gwau aitamoata kaveneveni. Ka unuani, me Isiraeli habuhabuka Abaraham yana dede, kate nau-wawanika Levi ya tupua-nenenehi ai vo-pata kaveneveni.✧ ⁶ Ka Melikisedeki yana dede eha Levi. Kate Abaraham tauna ya guguaiia tana-vewani gwau ai yau 10 wayahia, ka gwau aitamoata Melikisedeki venei. Vona ahiahina, tuta-nana wayahina Abaraham avaha vona-dabadabana vaniahei Yaubada wayahina. Kate auyewana ainua ivi-vaniaha etawana wayahina, Melikisedeki Abaraham nau-iaivei. ⁷ Ka vona-vavaha, onoto ananina onoto kikituna nau-iaivei, iuna onoto kikituna eha ana pata onoto ananina na-nau-iaive. ⁸ Aituhu kanuanua tau vi-nomu Levi a tupua-nenenehi wayahia, kadueyei tau gwau aitamoata gwau ai yau 10 wayahia ivivituei, ka tau ononotoata, ka ianianiga. Kate aituhu kanuanua tau vi-nomu

✧ 7:5: Yau 18:21.

Melikisedeki wayahina, kadueyei tauna gwau aitamoata gwau ai yau 10 wayahia vituei, ka Yaubada voneka vivane tauna yawayawaina. ⁹⁻¹⁰ Aituhu kanuanua Levi wayahina, akanai kadueyei Mosese ya veimea Levi awaehei gwau aitamoata gwau ai yau 10 wayahia vivituei. Kate auyewana Abaraham Melikisedeki a vo-pata venei, Levi aveta? Vona ahiahina, tauna eha ya tupua auyewana wayahina. Tauna ya tupua ai vi-am ponimana munia vin'-omo. Wayahina kana-vona, auyewana wayahina Levi Abaraham ininina nihenina mamaei. Ka tutana Melikisedeki Abaraham vi-vaniahei, ka tutana Abaraham Melikisedeki a vo-pata venei, akanai kana-vona Levi kadu Melikisedeki a vo-pata venei deina. Iuna Levi itena nihenina mamaei. Wayahina, Melikisedeki ana wava Levi ana wava vane-tawanei kadueyei.

Tau Vi-nomu Tunina Wayahina

¹¹ Mosese ya veimea ivona tau vi-nomu aitamoata aitamoata nau-wawani Levi yana dede wayahina ivin'-omo, eha kadu aitam dede wayahina. Kate, vona ahiahina, tau vi-nomu-naia eha ai pata tomotau ivo-vine ivi-tau ahihinata. Wayahina kadueyei, tau vi-nomu-naia yai paisewa eha ana pata tomotau nuai inosi-vavaha. Wayahina, aitam iuna mamaei tau vi-nomu vovouna na-omo, ka vovouna Melikisedeki deina, eha Aroni deina, ka eha Levi yana dede wayahina. ¹² Unononi. Tutana Yaubada tau vi-nomuia tutuai yai paisewa kweui, akanai, tauna kadu veimea tutuaina kweui aitamoata deina.

13-14 Wayahina, udueyei. Yama ipupuna habuhabuna yaka Tau Ito-yavuha wayahina. Tauna yaka tau vi-nomu vovouna, ka yana dede eha Levi. Tauna yana dede vivane Iuda. Ka eha aitam koiaka dede Iuda wayahina ta-paipaisewa Yaubada ya pai vi-nomu wayahina. Ka Mosese ya veimea nihenina eha aitam vona ta-mamae n'-awaehe tau vi-nomu dede Iuda wayahina in'-omo.*

Kadu Aitam Tau Vi-nomu Melikisedeki Deina

15 Wayahina, kanamane-vidoha Yaubada avaha ya veimea tutuaina tau vi-nomu wayahi vo-vinei. Iuna yaka tau vi-nomu vovouna avaha omoi, ka tauna Melikisedeki deina. 16 Mosese ya veimea voneka dede aitamoata ivi-tau vi-nomu. Kate yaka tau vi-nomu vovouna avaha vi-tau vi-nomu, kate Mosese ya veimea eha iuna. Tauna vi-tau vi-nomu iuna yawaina ma'-vavaha, ka eha aitam koiaka ana pata na-vita-vovoni. 17 Wayahina Yaubada ivona,

“Wamke evi-tau vi-nomu ma'-vavaha,
Melikisedeki deina.”*

18-19 Vona ahiahina, vonaia tau vi-nomu wayahi Mosese ya veimea nihenina vivane tutuaina, ka Yaubada viwaveneka awaehana kani-tawanei kana-vane. Iuna awaehana tutuaina ihanua kadu awakabina. Ka Mosese ya veimea eha ana pata aitam aviani na-vo-vi-tunuhi-yehai. Kate yaka vitumahana vovouna ahiahina, ka veimea tutuaina vane-tawanei. Wayahina, ataina

* 7:13-14: Isa 11:1; Mat 2:6; SiV 5:5. * 7:17: Ebe 5:6.

Yaubada kavitumahanei kadu tauna wayahina kavi-maupwani.✧

²⁰ Ka kadu ataina kanuani tutana Iesu vi-tau vi-nomu, Yaubada aitam vona hetana boui! Tuta nonova wayahina, tutana onotoi ivi-tau vi-nomu, eha aitam vona hetana ta-mamae.

²¹ Kate tutana Iesu vi-tau vi-nomu, Kauvea Yaubada aitam vona hetana boui, ivona,

“Kauvea avaha vona-dabadaba,
ka eha ana pata ya nuanua taina na-vo-vine,
‘Wamke evi-tau vi-nomu ma'-vavaha.’”✧

²² Wayahina kanamanei, awaeha vovouna awaeha tutuaina vane-tawanei, iuna Iesu viwaveneka deinake.✧

²³ Tuta nonova a itoava tuta ataina wayahina, tau vi-nomu habuhabui iomomo ineine. Iuna aniga yai paisewa bou-potepotei. Wayahina, nau-wawani onotoi vovou inau-seani. ²⁴ Kate Iesu yaka tau vi-nomu ma'-vavaha, iuna tauna aniga wayahina mini-havine, e ataina ma'-vavaha. ²⁵ Wayahina, aituhu aviyaivia Iesu ivitumahanei, tau in'-omo Yaubada wayahina. Ka Iesu ana pata habuhabui na-ito-yavuhi. Iuna tauna ma'-vavaha, ka tuta ataina wayahina ya paisewa deina. Tuta habuhabuna wayahina aviani nau-wawanika, akanai tauna Amana viamei wayahika.✧

²⁶ Vona ahiahina, Iesu ana pata na-ivaiteka ya paisewa tau vi-nomu ananina wayahina. Iuna tauna yana dewa habuhabui ahihinata. Ka

✧ **7:18-19:** Ebe 10:22; Iam 4:8. ✧ **7:21:** Ebe 5:6. ✧ **7:22:** Ebe 8:6; 12:24. ✧ **7:25:** Rom 8:34.

eha aitam koiaka ana pata tauna yana dewa goyona wayahina na-mana-giboe, iuna tauna tunina, eha itoka tau goyogoyoka habuhabuka deina. Ka Yaubada avaha Iesu si-nai, e Iesu tau ma¹ wahuma habuhabui vane-tawane-neiei. ²⁷ Tau vi-nomuia ananina tutuai nau-wawani auyewa aitamoata aitamoata nihenina vi-nomu ivi-nomu-havihavine¹ Yaubada wayahina. Naona idedewei deina tau¹ ai heta yai goyona wayahi. Ka munia, idedewei deina mani tomotau yai goyona wayahi. Kate Iesu tuta aitamoata-hoina wayahina ininina vi-nomui yaka dewa goyona wayahi.✧ ²⁸ Mosese ya veimea awaehei tomotau ihanuai ivi-tau vi-nomu anani. Kate veimeana ana tuta munia, Yaubada tauna yana vona hetana boui, ka vonana voneka Natuna vi-tau vi-nomu ananina, ka nonova ana inahē habuhabui vaniahei, ivo-vi-ai-ai-yehai. Wayahina, tuta ataina wayahina tauna ana pata ana noe paipaisewei tunutunuhina wayahika.

8

Iesu Yaka Tau Vi-nomu Ananina Pai Nau-yehata

¹ Yau vona habuhabuna a pai mini kadu iuna taina. Tuta ataina wayahina yaka tau vi-nomu ananina avaha ivane wahuma, ka manuenta Yaubada Ahihinata ya pai manuenta ahihi-vainena ateina, ka mamaei. ² Kadu tauna vi-tau paisewa Yaubada ya manua-hoina ahihinata wahuma wayahina. Tomotau eha manuana ita-yone, kate Kauvea, tauna yonei.

✧ 7:27: Ebe 5:3.

³ Ka tanopia tau vi-nomu habuhabui yai paisewa am-venena-kavovo kadu vi-nomu vahitau Yaubada iveneveni. Akaka yaka tau vi-nomuna vovouna nau-wawani tauna kadu vi-nomu Yaubada venei. ⁴ Unuani. Aituhu tauna tanopia mamaei, eha ana pata tauna vi-tau vi-nomu. Iuna Mosese ya veimea avaha tau vi-nomu awaehi, vivane Levi ya tupua-nenenehi, ka tau avaha imamaei kadu ipaipaisewa. ⁵ Ka tau vi-nomu tanopia manua tapanono nihenina ipaipaisewa, kate tomotau manua tapanonona wahuma iaito-vi-tamani vivane anuana deina. Manua tapanono wahuma vivane manua tapanono-hoina. Unuani, tutana Yaubada Mosese veimeyei ine tapanono tanopia na-nau-vevewanei, ivona,

“Enua-vi-avini dewa aitamoata aitamoata
ana dune eyonei avaha oya aviwavenem
deina.

Ka dewa habuhabuna edewa-v^l-iunei.”✧

⁶ Ka tuta ataina wayahina Yaubada avaha Iesu tauna ya paisewa venei. Ka tauna ya paisewa tau vi-nomuia tanopia yai paisewa vane-tawanei. Ka kadu aitamoata deina, tauna awaeha vovouna veneveneka ya paisewa Yaubada wayahina, ka awaehana awaeha tutuaina vane-tawanei. Iuna Yaubada tauna ya vona-dabadaba itoka ya tomotau veneka, ka vona-dabadabana dewa ahihi-vainena wayahina.✧

⁷ Aituhu awaeha tutuaina ahiahina ana noe, akanai, eha aitam iuna Yaubada awaeha vovouna

✧ **8:5:** Kol 2:17; Ebe 9:23; NiT 25:40. ✧ **8:6:** Ebe 7:22.

na-vevewane, a? ⁸ Kate tuta nonova wayahina
Yaubada tauna ya tomotau vona-opuopuei,
wayahina ivona,

“ ‘Apaina, tuta tepakaia wayahina,
awaeha vovouna avevewanei me Isiraeli
wayahi
kadu me Iuda wayahi.’[☆]

⁹ Ka Kauvea kadu ivona, ‘Ka awaehana vovouna
eha awaeha tutuaina aboui
yai tupua-nenenehi wayahi deina.

Tuta nonova wayahina aeta-naonaoui
papani Egipita wayahina ini-tawanei,
kate tutana ineine, tau i eha moviu ita-vi-ateteye,
kadu awaehana aboui wayahi ivihahaiei.

Wayahina tomotau avihahaiei.’

¹⁰ Ka Kauvea kadu ivona,
‘Ka apaina awaeha vovouna
me Isiraeli wayahi aboui deina.

Yau veimea nuai nihenina aboui,
kadu nuai nihenina aginumi imamaei.

Ka yauke tomotau yai Yaubada,
kadu tau i vivane natunatu.

¹¹ Ka tuta-nana wayahina
habuhabui in'-anamaneu deinake.

Wayahina, eha nau-wawani
yiai iviwavene, in'-anamaneu,
kadu eha nau-wawani vavanei ivonavona,

“Vaneiu, nau-wawanim

Yaubada en'-anamanei.”

Iuna auyewana wayahina habuhabui
in'-anamaneu.

Tau i ai wava anani,

[☆] **8:8:** Ier 31:31-34.

ka kadu tau ai wawa kikitui.
 12 Ka tuta tepakaia wayahina
 yauke yai dewa goyogoyoi
 anua-tavuni,
 ka eha kadu aitam tuta wayahina
 anuani.’ ”

13 Yaubada awaehana vi-wahani Awaeha Vovouna. Wayahina kanamanei, tauna avaha awaeha naona kweui. Wayahina, kana-vona awaeha naona ihanua kadu tutuaina, ka eha ani-hoina na-maiova.

9

Awa-dava Tanopia Kadu Awa-dava Wahuma

1 Awaeha naona wayahina veimea habuhabuna imamaei tapanono wayahina kadu aveta tomotau itapanono tanopia wayahina.✧

2 Naona ine tapanono inau-vevewanei vahitau wagai wayahina. Ka bubuna-honota ainua nihenina mamaei. Bubuna-honota naona nihenina maheta a pai vi-ai mamaei, ka palua a pai vi-ai mamaei, ka kadu palua ahihinata Yaubada ivenevanei a pai vi-ai hetana mamaei. Bubuna-honota naona tanoi ivi-wahani Pai Vi-ai Vito-pota. 3 Ka bubuna-honota naona bubuna-honota v^l-inuana ainua niwanina aitam pai bwa^l kwaikwaioyo, e bubuna-honota ainua tana-vewani. Ka bubuna-honota v^l-inuana tanoi ivi-wahani Pai Vi-ai Vito-pota-vainena.✧

4 Ka bubuna-honota v^l-inuana nihenina manina ahiahina a pai vi-ai goulav wayahina inau-vevewanei mamaei, kadu awaeha a pai

✧ 9:1: NiT 25:23–26:30. ✧ 9:3: NiT 26:31-33.

vi-ai goulaV wayahina ibwaei mamaei. Ka awaeha a pai vi-ai nihenina gugua aitonu yaka tupua-nenenehi wayahia imamaei. Aitam gugua gaeba goulaV wayahina inau-vevewanei mamaei, ka gaebana nihenina amane ana wava manaV mamaei. Kadu aitam gugua Aroni yana guna, aina nonova nau-sisi. Ka kadu aitam gugua awaeha naona ana hanu, e Yaubada tauna ya veimeaia nihenia ginumi imamaei.✧
⁵ Ka awaeha a pai vi-ai a pai bwa' hetana Didiga an' anelose ainua ivo-vi-wauni. Ka tau vi-nomu ananina pai bwae-nana nau-v'-itaitanei dayaha wayahina, e munia, Yaubada tomotau yai goyona na-nua-tavuni deina. Ka tuta taina eha tuta ahiahina anau-manamanai guguaia wayahi.✧ ⁶ Ka tuta nonova wayahina, avaha guguaia habuhabui ivo-vi-aiiaia, e tuta tuta wayahina tau vi-nomu inuina bubuna-honota naona, ka yai paisewa ipaipaisewei.✧ ⁷ Kate Pai Vi-ai Vito-pota-vainena tunina. Tau vi-nomu ananina ana heta tuta aitamoata ana heta ponimana aitamoata aitamoata nihenina inui, ka tauna a veimea vivane dayaha wayahina inui. Ka dayaha-nana tauna vi-nomui Yaubada wayahina tauna yana dewa goyona wayahi, kadu me Isiraeli habuhabui yai dewa goyona mwagemwagei idedewei wayahi.✧ ⁸ Ka Nuana Ahihinata viwaveneka dewaia wayahia Pai Vi-ai Vito-pota-vainena vivane eha waewaena. Ka ine tapanono-nana ana tuta nihenina eha ta-wae.

✧ **9:4:** NiT 16:33; 25:10-16; 30:1-6; Yau 17:8-11; VV 10:3-5. ✧ **9:5:** NiT 25:18-22. ✧ **9:6:** Yau 18:2-6. ✧ **9:7:** Lev 16:2-34.

⁹ Dewaia pai dune itoka tomotau vovouka ataina kamamaei wayahika. Ka kadueyei am-venena-kavovoia tutuai kadu vi-nomuia tutuai eha ai pata tau vi-nomu an' ayaunena inau-wohi-vavaha yana dewa goyona wayahi, kadu eha ai pata me Isiraeli ai ayaunena inau-wohi-vavaha yai dewa goyona wayahi. Tau yai dewa goyona inuanuani. ✧ ¹⁰ Tau vi-nomuia yai dewa pai am, kadu yai dewa pai nim, kadu yai dewa pai nosi ai heta wayahi. Ka dewaia habuhabui iaihanua. Ika, dewaia habuhabui awaeha naona wayahina eha tomotau nuaka wayahi. Ka dewaia tutuai ai tuta mamaei a itoava awaeha vovouna ana tuta vin'-omo wayahina.

¹¹ Ka tutana Tau Ito-yavuha omoi, tauna vi-tau vi-nomu ananina dewa ahiahi vovoui wayahi. Ka tuta ataina wayahina dewaia ahiahi avaha wayahikaia imamaei. Ka tauna pai tapanono wahuma inui. Ka pai tapanono-nana ine tapanono tanopia kadu manua tapanono habuhabui tanopia vane-tawanei. Pai tapanono wahuma ma'-vavaha, ka tomotau eha ita-yone.

¹² Ka tutana Iesu Pai Vi-ai Vito-pota-vainena wahuma inui, tauna eha vahitau gotiV dayahina wayahina ta-nu o kadi bulumakauV natuna dayahina wayahina ta-nu. Eha. Tutana tauna inui tuta aitamoata wayahina tauna ana heta dayahina wayahina inui, e nua-piaha ma'-vavaha kadu ito-yavuha ma'-vavaha paisewei wayahika deinake. ¹³ Tuta nonova wayahina, aituhu tomotau dewa gawagawamina ivo-dadani, Mosese ya veimea nihenina aitam

✧ **9:9:** Ebe 10:1-2.

veimea mamaei, e veimeana tau vi-nomu awaehi tomotau inini ihadani gotiV dayahina wayahina, o bulumakauV dayahina wayahina, o kadi bulumakauV vavinena iapuni hanavui wayahina. Ka avaha tau vi-nomu dayaha ka hanavui inau-v'-itaitanei tomotau hetaia, akanai dewana aviani vo-vi-gawagawami Yaubada matana epa-yavunei.✠ ¹⁴ Ka aituhu dewaia tutuai wayahia tomotau ai pata inini ividoha Yaubada matana, kaiwadi avaha kanamanei, Tau Ito-yavuha dayahina pai hadana ahihi-vainena nuaka wayahi. Iuna tauna yawaina tunutunuhi-vainena, eha aitam yana dewa goyona. Ka tauna ana heta ininina vi-nomui Yaubada wayahina, ka tauna dewei deina Nuana Ma'-vavaha ya bagibagi wayahina. Ka avaha aka ayaunena vo-vi-hadani deina, eha nau-wawanika yaka nuanua dewa aninigai kadedewe, kate nau-wawanika yaka nuanua kavi-tau paisewa Yaubada yawawayaina wayahina!✠

¹⁵ Wayahina, Tau Ito-yavuha awaeha vovouna Yaubada wayahina omanei wayahikaia. Ka Yaubada honehoneka kavitumahanei tauna ya nuanua ya vona-dabadabana wayahina yawai-vavaha kavaniahei. Ka dewana ana pata, iuna Tau Ito-yavuha avaha aniga yaka dewa goyona wayahi. Unuani. Awaeha naona veimeyeka dewa-yaiyai kavaniahei yaka dewa goyona ai nau-pata wayahina. Kate tutana Iesu aniga wayahika, yan' aniga ito-yavuhika

✠ **9:13:** Lev 16:15-16; Ebe 10:4; Yau 19:9, 17-19. ✠ **9:14:** 1Pi 1:18-19.

dewa-yaiyaina wayahina.

¹⁶ Ka Iesu ya dewana kadu itoka tomotau yaka dewa ainua abou-viwavei unua-hau. Avaha tomotau ivi-nainai yai dewa uanamanei, tau yai nuanua pai nau-yehata iginumi mamaei. Ka iginumaia nihenina tau ginuma natunatui ai wava, o kadi vavanei ai wava itomani, e yai aniga munia, tomotau yai gugua ivaniahei. Ka aituhu aitam tau wayahia ya nuanua guguaia n'-epei, tauna nau-wawani naona tau eta-naonao viwavenei tau ginuma avaha aniga. ¹⁷ Ka aituhu tau ginuma yawayawaina mamaei, tau vaniaha nau-wawani ipotapota a itoava yan' aniga munina wayahina. ¹⁸ Dewana iuna Yaubada yan' awaeha naona nau-wawani vi-putu dayaha wayahina. ¹⁹ Wayahina, naona Mosese Yaubada ya veimea aitamoata aitamoata haeyei tomotau wayahia inononi. Iakwa, e bulumakauV natuna kikituna kadu gotiV inau-vi-anigi, e dayahina epei, e kadu daudau epei, e sipiV vutuvutuna ivo-vi-yabeni epei, ka kadu aitam ai ana wava isopaV nahana epei, e Iginuma a pai nunuma kadu tomotau habuhabui nau-v'-itaitanei dayahina wayahina.✧ ²⁰ Ka Mosese ivona,

“Yaubada awaeha vevewanei wayahimia,
kadu veimeyemi udedewei,
ka awaehana a dayaha taina.”

²¹ Ka kadu deina, Mosese dayaha epei, e ine tapanono kadu gaebaia ine nihenina dayahea nau-v'-itaitanei.✧ ²² Ka Yaubada ya veimea

✧ 9:19: NiT 24:6-8. ✧ 9:21: Lev 8:15, 19.

nihenina veimea habuhabuna mamaei hadana wayahina. Ka ivona eha ani-hoina dewa habuhabui kadu gugua habuhabui ai hadana ivin'-omo dayaha ana heta wayahina. Ka aituhu dayaha eha, akanai eha ana pata tomotau nua-piaha ivaniaha yai dewa goyona wayahi.✧

Tau Ito-yavuha Goyona Habuhabui Kweu-yehai

²³ Wayahina, Ine Vito-pota kadu a gugua tanopia nau-wawani Mosese vo-vi-aiaia vahitau dayahi wayahina, e munia tau ai pata tapanono wayahina. Kate ine-nana kadu a gugua eha pai tapanono-hoina. Pai tapanono-hoina wahuma imamaei. Ka pai tapanono tanopia pai nau-seana ana heta guguaia wahuma imamaei wayahi. Wayahina, pai tapanono-hoina wahuma nau-wawani ai hadana ivin'-omo vi-nomu ahihi-vainena wayahina, vivane Tau Ito-yavuha dayahina.✧ ²⁴ Iuna Tau Ito-yavuha eha tapanono a pai ito-vi-tamana tomotau iyonei ta-nuinu. Eha. Tauna pai tapanono-hoina wahuma inui, ka tenoke vi-nomu-nana wayahina vo-vi-aiaieka. Ka tuta ataina wayahina, tauna Yaubada matana mamaei, ka tauna ya paisewa na-ivaiteka.

²⁵ Ka Tau Ito-yavuha eha nau-wawani tuta habuhabuna wayahina tauna ininina vi-nomui Yaubada wayahina. Tau vi-nomu anani tanopia vahitau dayahi wayahina idedewei deina. Ponimana aitamoata aitamoata nihenia Pai Vi-ai Vito-pota-vainena inuinu, kate dayaha eha tau dayahi. Eha. Dayaha vivane vahitau dayahi. ²⁶ Vona ahiahina, aituhu Tau Ito-yavuha yana

✧ 9:22: Lev 17:11. ✧ 9:23: Ebe 8:5; 10:1.

dewa tau vi-nomu anani yai dewa deina, tauna nau-wawani inahe na-vaniahe, kadu n'-aniga havine havine tanopi a vevewana wayahina a itoava tuta ataina wayahina. Kate tuta ataina wayahina, vivane tuta a pai nau-yehata wayahina, tauna omo tuta aitamoata wayahina akanai. Ka tauna ya paisewa ininina vi-nomui yaka goyona ai pai nua-piaha wayahina.✧

²⁷ Itoka tomotau nau-wawanika kan'-aniga tuta aitamoata wayahina. Na-iakwa, nau-wawanika nau-yanahi kavaniahei. ²⁸ Ka kadu Tau Ito-yavuha omo, e tauna ininina vi-nomui tuta aitamoata ana heta wayahina deina. Ka paisewana wayahina tauna tomotau habuhabuka yaka goyona epa-yavunei. Ka kadu tuta tepakaia wayahina tauna na-omo-havine. Ka tuta v'-inuana wayahina ya vin'-omana eha dewa goyona wayahina. Eha. Tuta v'-inuana wayahina tauna ito-yavuha na-omane wayahikaia. Ka aituhu aviyaivia yai dewa-haiawa wayahina ipotepotei, tau i to-yavuhana ivaniahei.

10

¹ Apaina pai dewa-haiawa ahiahi iomomo wayahikaia kavaniahei. Aituhu Mosese ya veimea kavi-ateteyei, dewana eha ana pata na-ivaiteka dewaia ahiahi kavaniahe. Iuna Mosese ya veimea anuana ana heta deina. Ka anuana eha ana pata tomotau tau yai goyona wayahia na-ito-yavuhi. Mosese ya veimea ni-henina veimea mamaei vi-nomu vahitau wayahi. Ka tau vi-nomu anani vi-nomuia ivi-nomui

✧ 9:26: Ebe 10:10.

ponimana aitamoata aitamoata wayahia. Ka tuta tuta tau tapanono iomomo, e Yaubada iva-vi-maupwani, iuna yai nuanua ina-iwaodu wayahina. Kate vi-nomuia eha ai pata tau tapanono-naia ivo-vi-aiai-yehai Yaubada matana. ² Aituhu vi-nomuia ai pata tomotau ai ayaunena ivo-vi-aiai-yehai yai goyona wayahi, akanai yai goyona ina-iakwa, a? Aituhu deina, tau tapanono yai goyona habuhabui iakwa, ka kadu tau eha nau-wawani kadu aitam vi-nomu ivi-nomui. Ka aituhu deina, tau tapanono ai ayaunena ivi-doha-vavaha, ka yai ini-yauyau iakwa-vavaha, a? ³ Kate vi-nomuia eha ai pata dewana id-edewe deina. Eha-ohota! Ponimana aitamoata aitamoata nihenina vi-nomuia vivane dewa goyona a pai nuana, eha a pai nua-pani. ⁴ Iuna bulumakauV dayahi, o gotiV dayahi eha ai pata dewa goyona in¹-epa-yavune.* ⁵ Wayahina, tutana Tau Ito-yavuha omo tanopia, tauna Yaubada vonei, ivona,

“Yam nuanua eha vahitau vi-nomuia,
ka eha am-venena-kavovoia.

Kate yam nuanua vivane dayahiu.

Wayahina, ininiu evo-vi-aiaia
e yam paisewa apaipaisewei.*

⁶ Vahitau vi-nomuia iapupuni pai vi-nomu hetana
eha ita-vo-vi-dewa-haiawim.

Ka am-venena-kavovoia dewa goyona wayahi
eha ita-vo-vi-dewa-haiawim.

⁷ Wayahina, avonem, avona,
‘Yaubada, baina yauke taua.

* **10:4:** Ebe 9:13. * **10:5:** Sam 40:6-8.

Avaha aomo, e aviani yam nuanua adedewei.
 Ka nonova tau apa-taputapu
 yau paisewa taina wayahina
 iginuginumi Iginuma nihenina.’ ”

⁸ Naona tau ipupuna ivona, “Yam nuanua eha vahitau vi-nomuia, ka eha am-venena-kavovoia.” Kadu ivona dewaia “eha ita-vo-vi-dewa-haiawim.” Kadu ivona “vahitau vi-nomuia iapupuni pai vi-nomu hetana” goyona iepa-yavune deina “eha yam nuanua”. Udueyei. Tauna vonavona deina, kate yaka tupua-nenenehi dewaia habuhabui idedewei, iuna Mosese ya veimea veimeyei idedewei deina. ⁹ Ka kadu munia ivona, “Yaubada, baina yauke taua. Avaha aomo, e aviani yam nuanua adedewei.” Wayahina kadueyei, Yaubada ya nuanua avaha awaeha naona Mosese ya veimea wayahina kweui, ka awaeha vovouna boui. ¹⁰ Ka tuta aitamoata ana heta wayahina, Iesu Tau Ito-yavuha tauna ininina vi-nomui, ka itoka tau vitumahana avaha kavi-tau ahihikata dewana wayahina. Ka dewaia habuhabui ivin'-omo deina, iuna Yaubada ya nuanua deina. ¹¹ Auyewa aitamoata aitamoata tau vi-nomu aitamoata aitamoata imimini vi-nomu a pai vi-ai wayahina, ka yai paisewa ipaipaisewei. Tuta tuta vi-nomu ivi-nomu-havihavinei, kate vi-nomuia eha ai pata tomotau yai goyona in'-epa-yavune. ¹² Ka avaha Tau Vi-nomuna vovouna dewa goyona a vi-nomu-vavaha aitamoata vi-nomui, akanai,

✧ **10:10:** Ebe 9:12. ✧ **10:11:** NiT 29:38.

tauna manuenta Yaubada ateina. ¹³ Ka tuta ataina wayahina potapota a itoava tauna a havia habuhabui iomomo ina-iwaodu aena a pai vi-ai wayahina. ✧ ¹⁴ Iuna ya vi-nomu aitamoata-hoina, ka vi-nomuna wayahina ana pata itoka tomotau na-omaneka Yaubada wayahina, kadu ana pata na-hadani-vavahika yaka dewa goyona wayahia. ¹⁵⁻¹⁶ Ka dewana wayahina Nuana Ahihinata Iginuma nihenina Kauvea ya nuanua haeyeka. Naona tauna ivona,

“Apaina awaeha vovouna tau i wayahia aboui.
Ka yau veimea nuai nihenina atotohi,
ka kadu nuai nihenina aginumi ima-
maei.” ✧

¹⁷ Ka kadu ivona,

“Yai dewa goyona anua-pani-neiei.” ✧

¹⁸ Ka aituhu Yaubada avaha dewaia goyona nua-piahi-neiei, akanai, eha nau-wawanika kadu aitam vi-nomu goyo-naia wayahi kavi-nomui.

Itoka Nau-wawanika Yaubada
Kava-vi-maupwani

¹⁹ Yai iau, Iesu dayahina kadu yan' aniga avaha ito-yavuhika. Wayahina, tuta ataina wayahina Yaubada avaha awaheka Pai Vi-ai Vito-pota-vainena wayahina kanuina. ✧

²⁰ Ka yaka etawana vivane vovouna kadu yawayawaina. Nonova tutana ine tapanono

✧ **10:13:** Sam 110:1. ✧ **10:15-16:** Ier 31:33; Ebe 8:10. ✧ **10:17:** Ier 31:34. ✧ **10:19:** Ebe 4:16.

mamaei, aitam pai bwa' kwaikwaioyo, ka Pai Vi-ai Vito-pota-vainena bou-potei. Iuna Yaubada bubuna-honotana eha ta-wae. Ka avaha tomotau Tau Ito-yavuha ininina itutu-pwatepwatei, akanai tauna ininina pai bwa-e-nana deina. Ka tauna etawana waei wayahika ininina wayahina. Wayahina, tuta ataina wayahina memeanina kana-nu, e Yaubada matana kamamaei.☆ 21 Ka yaka Tau Ito-yavuha vivane tau vi-nomu ananina, kadu tauna Yaubada ya tomotau habuhabuka dune-vivinika. 22 Wayahina, nau-wawanika Yaubada kava-vi-maupwani, ka eha aitam vitupu nuaka nihenina. Iuna avaha vonaia Yaubada voneka kanamanej, ka kadu vonaia habuhabui kavitumahanej. Wayahina, aituhu avi ini-yauyau kavaniahej yaka dewa goyona wayahi, tuta ataina wayahina ini-yauyau-naia habuhabui iakwa. Iuna tauna aka ayaunena nau-v^l-itaitanei dayahina wayahina deina, ka kadu ininika nosia daudau mahemaheina wayahina deina.☆ 23 Wayahina, itoka nau-wawanika kamimini toyoina, kadu yaka nua-vaniaha nui Yaubada ya vona-dabadabana a nau-yehai kapotepotei. Nua-vaniaha-nana kahaehaeyei, iuna Yaubada eha tau vitupu. Aituhu aviani tauna vona-dabedabeyei, akanai dewaia habuhabui kavaniahej aitamoata deinake. 24 Ka kadu itoka nau-wawanika kanuanua medeina kavovi-vatuka kadewa-vidovidoheka, kadu dewa ahiahina kadedewei wayahika. 25 Yaiaka tupwai tapanono a nau-hohona ivihahaiei,

☆ 10:20: Mat 27:51. ☆ 10:22: Lev 8:30; Ese 36:25; Epe 5:26.

ka tuta tuta yai dewa deina. Kate dewana eha nau-wawanika. Ka tuta habuhabuna wayahina, itoka nau-wawanika kavo-vi-vatuka nui katapanono. Iuna avaha uanamanei, tuta tepakaia wayahina Iesu na-mavi-havine, ka auyewana omomo.✧

²⁶ Ka aituhu aviyaivia Yaubada yana vona tunutunuhina inononi ianamane-yehai, ka munia, aituhu yai dewa goyona inau-vinevinei, eha ivihahaie, akanai, eha kadu aitam vi-nomu dewaia goyona wayahi ta-mamae.✧ ²⁷ Ka aituhu aviyaivia idedewei deina, akanai dewa aitamoata ana heta mamaei tau wayahi, vivane matauta ananina wayahina ipotapota vitana matana an' auyewa wayahina. Ka avi tuta auyewana na-omo, tau avaha ianamanei ai dewa-yaiyai ai ananata ivaniahei. Iuna Yaubada a havia habuhabui ai-nana ivaniahei deina, ka ai-nana na-vita-vovoni.✧ ²⁸ Tuta nonova wayahina, aituhu aviyaivia Mosese ya veimea ivihahaiei, o aituhu aviyaivia itana-bwegei, veimeana tau eta-naonao veimeyei aituhu tau dune ainua o aitonu tau goyona yai dewa isi-vin'-omanei, akanai eha nau-wawani in'-ate-nuanuaie, kate tau nau-wawani inau-vi-anigi.✧ ²⁹ Unononi. Dewana ana heta Mosese ya veimea itana-bwegei. Ka aituhu aviyaivia Yaubada Natuna iva-taunei haina deina, kaiwadi, tau ai dewa-yaiyai ani-vainena potepotei, a? Iuna tau inuanua Iesu dayahina eha aitam aviani, wayahina ivihahaiei. Kate

✧ **10:25:** Ebe 3:13. ✧ **10:26:** Ebe 6:4-8. ✧ **10:27:** Isa 26:11.

✧ **10:28:** VV 17:6; 19:15.

awaeha vovouna omo wayahikaia Iesu dayahina wayahina. Ka Iesu dayahina hadanika. Ka aituhu aviyaivia Iesu ivihahaiei, tauu kadu Am-venena Awawaehina Nuana iapa-goyogoyoei deina.✧

³⁰ Avaha kanamanei vonana vona ahiahina, iuna avaha Tauna kanamanei. Tauna ivona,

“Yauke taua au heta dewa goyona anau-patei,
 Tau goyogoyoi ai dewa-yaiyai
 avi-nua-dadani.”

Ka tauna kadu ivona,

“Yauke yau tomotau anau-yanahi,
 kadi ahiahina o kadi goyona.”✧

³¹ Ka aituhu Yaubada Yawayawaina nua-goyo wayahikaia, kaiwadi nau-wawanika kamata-matauta ani-vainena.

³² Yaiyai, yama nuanua wayahimi tuta naona wayahina maheta vaneana unononi, ka tutana uvitumahana-vou unuanuani. Auyewaia wayahia vita tunina tunina kadu inahe habuhabui uvaniahei, kate eha yami vitumahana uta-vo-haini. Eha-ohota. Itomi utoha-vi-anaimi. ³³ Tuta-naia wayahia tomotau tau vi-meagai mataia ivo-v'-ini-yauyaumi, ka kadu ivo-vi-vihami, ka tupwai tuta itomi yami nuanua yaiami nui uviviha deina. ³⁴ Ka kadu tutana tomotau yaiami tupwai manua yohona ibouni, akanai, itomi yaiami wayahi uate-viviha. Iuna itomi yami nuanua kadu

✧ **10:29:** NiT 24:8; 1Ko 11:27-29; Mat 12:30-32. ✧ **10:30:** VV 32:35-36; Sam 135:14.

yaiami yai nuanua aitamoata. Ka kadu tutana tomotau iomo yami manua wayahia, e yami gugua iepai, ivainau deina, dewana eha yami nuanua, kate itomi ami pata yami dewa-haiawa wayahina utoha-vi-anaimi. Iuna avaha aviani nuami nihenina mamaei uanamanei, akanai dewana wayahimia ma'-vavaha, ka dewana patana guguaia habuhabui tanopia patai vane-tawanei.✧ ³⁵ Wayahina, tuta ataina wayahina nau-wawanimi uvo-vi-toyoimi, kadue yami vitumahana unua-vi-avini. Eha uhapone-tawanemi. Iuna apaina yami vitumahana a nau-pata ani-vainena uvaniahei. ³⁶ Ka nau-wawanimi umimini toyoina kadu utoha-vi-anaimi a itoava Yaubada ya nuanua udewe-yehai wayahina. Na-iakwa, aviani tauna vona-dabedabeyemi, akanai uvaniahei. ³⁷ Iuna Iginuma ivona,

“Tauna omomo, ka ya vin'-omana
tuta ahiahina wayahina,
ka tauna eha ta-vi-kiwada.✧

³⁸ Wayahina, aituhu aviyaivia tau tunutunuha,
akanai, tau yau tomotau.

Ka tau yai vitumahana wayahina
yawai-vavaha ivaniahei.

Ka aituhu aviyaivia imatamatauta,
imagigino, ivihahaieu,
tau wayahi eha ata-dewa-haiawa.”

✧ **10:34:** Mat 6:20; 5:11-12. ✧ **10:37:** Aba 2:3-4.

39 Kate itoka eha yoko-nana wayahia. Eha kamagigino, ka apaina eha vita-vovoni kavaniahe. Yaubada wayahina. Iuna itoka Yaubada yana vona kavitumahanei. Wayahina, apaina ito-yavuha kavaniahe.

11

Tau Vitumahana

¹ Vitumahana-hoina deina. Avaha kanamanei aituhu aviani yaka nua-vaniaha nui kapotapota tuta ataina wayahina, apaina dewana kadueyei, kavaniahe. Eha kava-hamwahamwana. Vona ahiahina, tuta ataina wayahina eha aka pata yaka nua-vaniaha pouna kadueye, kate kanamane-yehai apaina kavaniahe.✧ ² Tuta nonova wayahina Yaubada yaka tupua-nenenehi apa-vidovidohe i tau i yai vitumahana wayahina. ³ Itoka yaka vitumahana wayahina kanamanei Yaubada dewa habuhabuna vevewanei yana vona wayahina. Wayahina, dewaia eha ita-vin'-omo mani dewai kadueyei wayahia. Eha-ohota. Yaubada dewa habuhabuna kadueyei vevewane-neiei dewaia eha kata-dueye wayahia.✧

⁴ Onoto ana wava Abeli ya vitumahana wayahina vi-nomu ahiahina vi-nomui Yaubada wayahina. Ka ya vi-nomuna vaneina ana wava Kaini ya vi-nomu vane-tawanei Yaubada matana. Wayahina, Yaubada dewa-haiawa Abeli ya vi-nomuna wayahina, kadu apa-tunutunuhi, iuna ya vitumahana wayahina vi-nomui. Ka

✧ 11:1: 2Ko 5:7. ✧ 11:3: Nao 1:1; Sam 33:6; Ioni 1:3.

Abeli avaha tanopi taina ni-tawanei, kate tauna ya vitumahana-hoina itoka yaka pai dune ahiahina aitam.✧

⁵ Ka kadu onoto ana wava Enoki ya vitumahana wayahina eha t'-aniga. Yaubada tauna na yawaina epa-vaneyei wahuma. Iuna Yaubada mai-apa-vidovidohei, ka wayahina ivona, “Tauna yana dewa wayahina adewa-haiawa.” Ka Enoki avaha maiova, ka tau ma' tanopi inaunau-nene-wayohe, ka eha ai pata ivaniahe tanopia, iuna tauna wahuma mamaei.✧

⁶ Vona ahiahina, aituhu aviyaivia yai nuanua Yaubada ivo-vi-dewa-haiawi, tau nau-wawani Yaubada ivitumahanei. Ka aituhu aviyaivia ivin'-omo Yaubada wayahina, tau nau-wawani ivitumahanei tauna ma'-vavaha, kadu nau-wawani ivitumahanei aituhu inaunau-nene bagibagina tauna wayahina, apaina tauna dewana na-nau-patei ahiahina wayahina.

⁷ Ka kadu onoto ana wava Noa ya vitumahana wayahina. Ka tutana Yaubada nau-vi-avini dewaia vitana in'-omo wayahi, Noa nononi ka vi-ateteyei, ka wae ananina ana wava arikaV nau-vevewanei, e tauna ya nuanua yana yoko na-ito-yavuhi deina. Tauna ya vitumahana mamaei, kate tau ma' tanopi eha ita-vitumahane. Wayahina kadueyei, Noa ya vitumahana tau ma' tanopi yai dewa apa-goyogoyoei, kadu Yaubada Noa apa-tunutunuhi ya vitumahana wayahina.✧

⁸ Ka kadu onoto ana wava Abaraham ya vitumahana wayahina. Ka tutana Yaubada

✧ **11:4:** Nao 4:3-10. ✧ **11:5:** Nao 5:21-24. ✧ **11:7:** Nao 6:13-7:1.

honei, Abaraham vonana vi-munie, e ya meagai ni-tawanei, e aitam meagai vovouna mani papania vaniahei. Yaubada vona-dabedabei, apaina papani-nana Abaraham ya papani. Wayahina, tauna mini, ine, kate avi papani wayahina omomo eha t'-anamane.✧ ⁹ Ka kadu ya vitumahana wayahina avaha papani-nana vaniahei, inui, e mamaei aitam tau bwanibwani deina. Eha aitam manua ta-yone, kate vahitau wagana wayahina ine nau-vevewanei mamaei nihenia. Ka kadu munia, yana yoko Isaki kadu Iakobo imamaei ine nihenia aitamoata deina. Yaubada Abaraham vona-dabedabeyei tano-nana wayahina, kadu Isaki kadu Iakobo vona-dabedabeyei aitamoata deina.✧ ¹⁰ Ka Abaraham mamaei tau bwanibwani deina, iuna ya nuanua tuta tepaia mani meagai na-vaniahei, aitam meagai a tau vevewana kadu a tau yona vivane Yaubada. ¹¹ Ka Abaraham avaha vi-nainai, ka ya vavine ana wava Sara gagana. Kate Abaraham ya vitumahana mamaei. Ka tutana Yaubada Abaraham vona-dabedabeyei natuna wayahina, akanai Abaraham vonana vitumahanei. Iuna tauna nuanua Yaubada eha ana pata vitupu, kate vona tunutunuhina ana heta vonevonei.✧ ¹² Wayahina, Abaraham vi-nainai, ka dewa vi-natuna wayahina tauna onoto aninigana deina. Kate munia, Yaubada ya vona-dabadabana wayahina Abaraham yana yoko ivin'-omo, ka yana yoko ivi-habu-vainei, e tuta munia wayahina yana yoko ai yau wadima

✧ **11:8:** Nao 12:1-5. ✧ **11:9:** Nao 35:12. ✧ **11:11:** Nao 18:11-14; 21:2; Rom 4:19.

wahuma imamaei ai yau deinake, ka kadu mag-ama tania ai yau deina.✧

¹³ Tau vitumahanaia habuhabui ai wawa avaha atomani nonova ianiga. Ka tutana ianiga, tau i yai vitumahana pouna eha ita-vaniahe. Taiu Yaubada ya vona-dabadabaia ivitumahanei, ka vona-dabadabaia poui iawaehei aitam aviani bana mamananina ai pata idueyei deina. Ka tutana dewaia vaneana inononi, akanai idewa-haiawa wayahi. Wayahina, tau i yawai tanopia nihenina iawaehei aitamoata tau i yai papani-hoina eha tanopi. Kate baina tau i imamaei tau bwanibwani deina.✧ ¹⁴ Vona ahiahina, aituhu aviyaivia iawaehei aitamoata deina, akanai iviwaveneka yai nuanua papani tunina wayahina inaunau-nene, vivane yai papani-hoina. ¹⁵ Ka aituhu tau vitumahana-naia inuanua ananina yai meagai tanopia avaha ini-tawanei wayahia, akanai, tau i ai pata imavina meagai-naia wayahia. ¹⁶ Kate tau vitumahana-naia yai nuanua tunina. Yai nuanua ananina papani tunina ivaniahe. Ka papani tunina, vivane papani wahuma, baina tanopia vidoha-tawanei. Wayahina, avi tuta tomotau i ihaehaeyei tauna yai Yaubada, akanai Yaubada eha na-ini-yauyau yai dewana wayahina. Iuna Yaubada avaha yai meagai vo-vi-aiiaia wayahi.

¹⁷⁻¹⁸ Ka kadu aitam tuta wayahina Abaraham ya vitumahana mamaei. Ka tutana Yaubada tauna nau-dadani, Abaraham natu-hoina Isaki awaehei vi-nomui Yaubada wayahina. Nonova,

✧ **11:12:** Nao 15:5; 22:17. ✧ **11:13:** Nao 23:4; 1Va 29:15; Sam 39:12; 1Pi 2:11.

ponimana habuhabui iakwa, Yaubada avaha vona-dabedabeyei Isaki wayahina, e Abaraham wayahina ivona,

“Tuta tepakaia wayahina Isaki ana heta wayahina
yam tupua-nenenehi ivin'-omo.”

Kate Abaraham natu-nana awaehei nau-vi-anigi. ✧ ¹⁹ Ka Abaraham ana pata na-dewei deina, iuna tauna anamanei Yaubada ana pata tau aninigai na-si-vi-mini-havinei. Ka kana-vona Abaraham ya dewana iakwa, dewana ana dune natuna aniga wayahina mavi-havine deina. ✧

²⁰ Ka Abaraham natuna ana wava Isaki kadu ya vitumahana wayahina. Wayahina, tauna natu-natuna Iakobo ka Esau ainua nau-iaivei yai tuta omomo wayahina. ✧

²¹ Ka kadu Iakobo ya vitumahana wayahina. Ka tutana tauna eha ani-hoina n'-aniga, yana guna hetana nau-vana ka Yaubada awa-davei, e Iosepa natunatuna ainua vi-honei iomo, e tauna nau-iaivei. ✧

²² Ka kadu Iosepa ya vitumahana wayahina. Ka tutana tauna eha ani-hoina n'-aniga, akanai me Isiraeli yai opu papani Egitita wayahina mai-haeyei. Ka tauna veimea boui vivane yan' aniga munina, me Isiraeli tauna numanumana ipoy'-avini. Ka aituhu avi tuta papani Egitita

✧ **11:17-18:** Nao 21:12; 22:1-14. ✧ **11:19:** Rom 4:17. ✧ **11:20:** Nao 27:27-29, 39-40. ✧ **11:21:** Nao 47:31-48:20.

ini-tawanei, akanai, tau nau-wawani tauna nu-manumana wayahia iopu, e munia yai papani nihenina itavuni.✧

²³ Ka kadu Mosese ayo-amana yai vitumahana wayahia. Ka avaha Mosese tupua, tau ainuai ibou-hivei wahava aitonu nihenia. Iuna ana dune ahiahina, ka avaha ianamanei, tauna mani tevana vane-tawanei. Ka eha KiniV ParaoV ya veimea panina ita-mataute.✧

²⁴⁻²⁵ Ka kadu Mosese ya vitumahana wayahina. Ka avaha vi-onoto, yawaina ahiahina ka memeanina tauna ParaoV natuna vavinena natuna, kate Mosese dewaia vihahaiei. Aituhu tauna ParaoV wana, akanai memeanina yawaina ana tuta nihenina goyona a dewa-haiawa ayaunei kadu ana pata dewa-haiawa wayahia. Kate tauna yawaina vitana Yaubada ya tomotau wayahia vi-nua-dadani. ²⁶ Mosese yana dewa deina, iuna tauna Yaubada ya vona-dabadabana nau-pata ma'-vavaha wayahina vitumahanei. Wayahina, tauna dewa ainua bou-viwavei, vivane papani Egitita a kaikaiwabo ananina, ka ini-yauyau kadu awa-viaoha Tau Ito-yavuha wayahina. Ka tauna vitumahanei aituhu ini-yauyau na-vaniahei iuna tauna Yaubada vi-munie, akanai munia nau-pata ahiahina na-vaniahei Yaubada wayahina, ka nau-patana kaikaiwabo-naia vane-tawanei. ²⁷ Ka kadu ya vitumahana wayahina papani Egitita na-ni-tawanei, eha KiniV ParaoV ya nua-goyo ta-mataute. Itoka tomotau eha aka pata Yaubada kadueye matakaia. Ka Mosese toha-vi-anai,

✧ **11:22:** Nao 50:24-25; NiT 13:19. ✧ **11:23:** NiT 1:22; 2:2.

iuna ya vitumahana wayahina tauna Yaubada dudueyei deina. ²⁸ Ka kadu Mosese ya vitumahana wayahina Itouvuha Toneina dewei tunuhina. Ka me Isiraeli dayaha wayahina yai manua inau-pesipesia, e ununu-taui ai tau nau-vi-aniga ibou-potei yai manua wayahia deina.✧

²⁹ Ka kadu me Isiraeli yokoia yai vitumahana wayahia. Wayahina, taui Hawana Yabebenina iaubo-tamana tanopi ayayana wayahina. Kate tutana me Egipita ivitapewa ivi-munie, kadu idewa-dadana iaubo-tamana, taui eha ai pata, e habuhabui igavivina.✧ ³⁰ Ka me Isiraeli yokoia yai vitumahana wayahia, ka tutana taui meagai Ieriko itutu-vivini auyewa ai yau 7 nihenia, akanai meagaina a tutu-gana ananina ipeu iopu.✧

³¹ Ka kadu tau kenekenene vavinena ana wava Rahaba ya vitumahana wayahina. Ka tutana me Isiraeli imavina eha ani-hoina tomotau eha Yaubada ita-vi-ateteye ivita-vovoni, eha Rahaba nui ita-nau-vi-anigi, kate iaito-yavuhi. Iuna tutana tau dune hivahivana naona iomo meagaina idune-nau-nene, Rahaba nau-kaiwei kadu ivaitei.✧

³² Ka medeina au pata tau vitumahana habuhabui ai viviwava anau-viviwava-yehai? Eha aka pata Gideoni, ka Baraka, ka Samsoni, ka Iepita, ka Davida, ka Samuela kadu tau apa-taputapu habuhabui ai viviwava kanononi.✧

³³ Taui yai vitumahana wayahina dewa tunina

✧ **11:28:** NiT 12:21-30. ✧ **11:29:** NiT 14:21-31. ✧ **11:30:** Ios 6:12-21. ✧ **11:31:** Ios 2:1-21; 6:21-25; Iam 2:25. ✧ **11:32:** TV 6:11-8:32; 4:6-5:31; 13:2-16:31; 11:1-12:7; 1Sa 1:1-1Ki 2:11.

tunina idedewei. Tupwai papani inau-havia ka ivane. Ka tupwai yai tomotau iveimeyei tunuhina. Ka tupwai Yaubada yana vona tunutunuhina ivi-munie, e iakwa, aviani Yaubada vona-dabedabeyei ivaniahei aitamoata deinake. Tupwai vahitau manimanini ana wava lioniv awai ibou-potei.✧ 34 Ka kadu tupwai ai yabeyabena anani ikweu-neiei, e tupwai havia ana tuta wayahina inama nihona inovo-tawanei. Tupwai iaihanua, kate Yaubada ivaitei ibagibagi. Ka kadue tupwai havia ana tuta wayahina iate-vatu-vaine, e tau bwanibwani ai tau nau-havia ivita-vovoni-neiei.✧ 35 Ka kadu tupwai vaivine yai vitumahana wayahia. Ka tau yai yoko avaha aninigai imini-havine ivaniahe-havine.

Ka kadu tupwai tomotau yai nuanua yawai-vavaha ahihi-vainena ivaniahei mini-havine ana tuta wayahina. Wayahina, tutana ai havia ivito-nubui, akanai tau viha ani-vainena ivaniahei tanopia. Ka eha it'-awaehe goyona idedewe, e munia ai havia iyavuhi. Eha. Yavuhi-nana ivihahaiei.✧ 36 Ka tau vitumahana ai havia imamaei, ka ivi-waipoei, ka yavunai wayahia ivunuvunui. Ka tupwai ai havia ipoy'-avini, iyohoni, e manua yohona nihenina ibouni, imamaei.✧ 37 Tupwai ai havia itutu-hanuhanu-neiei ianiga, ka tupwai ai havia iaupwa-nuei, ka tupwai inama wayahia inau-vi-anigi-neiei. Ka tupwai eha ai kwama ahiahina. Wayahina, sipiv wagana o kadi

✧ **11:33:** Dan 6:1-2. ✧ **11:34:** Dan 3:23-27. ✧ **11:35:** 1Ki 17:17-24; 2Ki 4:25-37. ✧ **11:36:** 1Ki 22:26-27; Ier 20:2; 37:15; 38:6.

gotiV wagana wayahina ivivi-kwama ka yai ma' vita tau payapayaya deina, iuna tomotau ivi-goyo-neiei.✧ ³⁸ Tau ma' tanopi-naia goyona, ka tau vitumahanaia ahihi-vainena. Eha nau-wawani tau tau ma' tanopi nui imamae! Tupwai ini-awana-kavokavovo papani anata nihenia, kadu papani oyaoyana wayahia. Ka tupwai yai pai ma' guba o guni tanopia.

³⁹ Ka Yaubada dewa-haiawa tau vitumahanaia habuhabui wayahi, iuna tau tau yai dewa yai vitumahana si-vin'-omane! Kate unononi. Tau habuhabui eha Yaubada ya vona-dabadaba pouna ita-vaniahe tanopia. Tau inononi ana heta. ⁴⁰ Yaubada ya nuanua awaeha vovouna awaeha tutuaina vane-tawanei. Ka kadueyei Yaubada ya nuanua itoka tau ekalesia tau vitumahana tuta nonova wayahina nui kavi-yoko aitamoata, e tau nui kavi-tau ahihikata.

12

Yaubada Vivane Amaka

¹ Yaubada avaha yaka etawana viwaveneka, aitam pai nau-bwanunua pai viam-wanene ananina nihenina deina. Ka tau vitumahanaia habuhabui ai wava avaha atomani wahuma inau-hohona, idudueyeka. Wayahina, itoka nau-wawanika pai vito-paine aitamoata aitamoata kahaponei. Iuna memeanina dewa goyona wayahina n'-ana-dibidibieka, kadewei kavi-goyo. Wayahina, nau-wawanika dewa goyona habuhabui kavihahaiei, e aka pata yaka gwahea wayahina kanau-bwanunua

✧ **11:37:** 2Va 24:21.

ahiahina.✧ ² Itoka nau-wawanika Iesu wayahina katata-vavaha. Iuna Iesu yaka vitumahana a pai vi-putu kadu a pai nau-yehata. Tutana Iesu tanopia mamaei, tauna anamanei dewa-haiawa ananina potepotei. Ka kadu tauna avaha anamanei avi tuta ya paisewa habuhabuna na-nau-yehai, akanai munia dewa-haiawana na-vaniahei. Wayahina, tauna viha ani-vainena ai nahenahea awaehei ayaunei, ka toha-vi-anai. Ka tauna kadu ini-yauyau ananina vaniahei deina. Kate dewaia iakwa, e tauna ivane wahuma, e manuenta Yaubada ya pai manuenta ahihi-vainena ateina wayahina. ³ Eha yau nuanua una-ihanua, ka eha yau nuanua yami vitumahana uhapone-kavokavovo. Itomi nau-wawanimi Iesu unua-vi-avini. Tutana onotoi goyogoyoi ivi-havia tauna wayahina, akanai tauna toha-vi-anai ananina a itoava ya paisewa nau-yehai wayahina. ⁴ Ka vona ahiahina, itomi avaha dewa goyona uvihahaiei, kate eha uta-vihahaie a itoava dayahimi taitaina wayahina, Iesu deina. ⁵ Kate avaha Yaubada yana vona pai ate-vatu unua-paniei. Vonana wayahina tauna vi-wahanimi natunatuna, ivona,

“Natu, aituhu avi tuta Kauvea ya nuanua
 yawaim na-vo-vi-tunutunuhi,
 eha nau-wawanim yana dewa evihahaie.
 Kadu aituhu avi tuta tauna yam dewa goyona
 viwavenem en'-anamanei,
 eha enua-vita dewana wayahina.✧

⁶ Iuna aituhu aviyaivia Yaubada awaehei

✧ 12:1: 1Ko 9:24-25. ✧ 12:5: VT 3:11-12; Iob 5:17; SiV 3:19.

taui natunatuna, akanai
 tauna kadu taui dewa-vidovidohei.
 Ka tauna kadu yawai vo-vi-tunutunuhi,
 kadu yai dewa goyona wayahi
 dewa-yaiyaiei.”

7 Wayahina, aituhu avi tuta tau ma' tanopi ipiahimi o idewa-yaiyaiei iuna itomi tau ekalesia, akanai itomi nau-wawanimi utoha-vi-anaimi, kadu unuanua inahe-naia ivin'-omo Amami wahuma wayahina. Unononi. Inahe-naia viwavenemi Yaubada nuanua vivane itomi natunatuna. Iuna onoto aitamoata aitamoata tanopia natunatuna dewa-yaiyaiei.✧ 8 Wayahina, aituhu Yaubada natunatuna habuhabuna vo-vi-tunutunuhi kadu dewa-yaiyaiei, ka aituhu wamke eha dewa-yaiyai eta-vaniahe, akanai wamke eha Yaubada natuna aitam. Kaiwadi, wamke aitam pamkeda, a? 9 Baina tanopia amamaka ivo-vi-tunutunuhika, idewa-yaiyaieka, ka itoka aka pata kan'-awaehei yai dewaia vivane tunutunuhina. Wayahina, memeanina kanua-hai nau-wawanika Yaubada yana dewa wayahika kan'-awaehei aitamoata. Tauna nuaka amana. Wayahina, nau-wawanika kavi-ateteyei, e munia yawai-vavaha kavaniahei. 10 Baina tanopia amamaka idewa-yaiyaieka tuta kutakutana wayahina. Ka aviani ahiahina taui mataia, akanai, ivo-vi-tunutunuhika deina. Kate aituhu avi tuta Yaubada vo-vi-tunutunuhika ka dewa-yaiyaieka, tauna dedewei itoka kavidoha dewaia wayahia. Iuna ya nuanua itoka kavi-tau ahihikata, tauna aitamoata deina.

✧ 12:7: VV 8:5.

11 Vona ahiahina, aituhu avi tuta dewa-yaiyai kavaniahei, tuta-naia wayahia dewaia eha pai dewa-haiawa, kate pai nua-vita. Kate munia, aituhu yawaika ividoha dewa-yaiyaia wayahia, akanai nua gomagomanina kavaniahei, kadue uana ahiahina vin'-omo dewa-yaiyaia wayahia, vivane yawaika tunutunuhina.✧ 12 Wayahina, itomi nau-wawanimi nimami ihanuai usi-nai, kadu ae-tutumi itatatava uvo-vi-bagibagi, e pai nau-bwanunua baina tanopia unau-bwanunua ahiahina.✧ 13 Nau-wawanimi etawana tunutunuhi ai heta uvenavenau. Ka aituhu deina, apaina aemi begabegana eha igoyo-vainena, kate ividoha ami pata pai nau-bwanunuana unau-yehai.✧

Viwavenena Kadu Vona Panina Ainua

14 Itomi kadu nau-wawanimi tuta tuta udewa-dadani nua gomagomanina nihenina umamaei tomotau habuhabui wayahia. Ka kadu nau-wawanimi udewa-dadani tuta tuta yawaimi ahihinata. Iuna aituhu aviyaivia yawai eha ahihinata, eha ana pata tau in'-omo imamaei Kauvea matana. 15 Udune-vivinimi. Iuna eha yau nuanua aitam wayahimia am-venena awawaehina Yaubada wayahina na-tutu-haini. Ka aituhu aitam wayahimia vi-tau nua-goyo, dewana eha ahiahina habuhabumi wayahimia. Iuna apaina tauna yawaina daudau goyona deina, ka tomotau habuhabumi vitana uvaniahei tauna wayahina. 16 Ka kadu udune-vivinimi. Iuna eha yau nuanua aitam wayahimia vi-tau

✧ 12:11: Iam 3:17-18. ✧ 12:12: Isa 35:3. ✧ 12:13: VT 4:26.

kenekenene, ka eha yau nuanua tauna Yaubada yana gabu na-hapone-tawane-kavokavovo. Tuta nonova wayahina onoto ana wava Esau ya tupua wayahina unu-tauna. Kate tauna unu-tauna a nau-iaiaava habuhabuna haponei ioyoma an' am aitamoata wayahina.✧ ¹⁷ Ka unuani, tuta munia wayahina Esau ya nuanua unu-tauna a nau-iaiaava na-vaniahe-havine, kate eha aitam etawana ta-mamae wayahina. Tauna toutou, kadu hidahida, kate eha ana pata ya vihaihai na-kweui. Tauna avaha unu-tauna a nau-iaiaava vo-haini iakwa.✧ ¹⁸⁻¹⁹ Ataina tuta wayahina itomi avaha uomo Yaubada ya papani wayahina, kate eha tuta nonova deina. Nonova me Isiraeli iomo Oya Sinai wayahina. Ka ai veimea mamaei aituhu aviyaivia oyana ivo-dadani, akanai nau-wawani tomotau itutu-hanuhanui. Ka oyana wayahina ai yabeyabena, kadu novanovana ananina, kadu oaoa badobadona, kadu yahina ananina, wedinia deina, kadu bwegigi a putuna maininina, kadu Yaubada movina ananina inononi. Ka tutana tomotau movina inononi, imatamatauta kaiwadi. Wayahina, Mosese ihidehidei eha kadu aitam vona inononi movi-nana wayahina.✧ ²⁰ Iuna avaha veimeana inononi, ivona, “Veimeana vivane vona panina. Medeina aka pata kavi-munie?” Veimeana ivona,

“Eha aitam aviani oya taina na-vo-dadani.

Aituhu aitam vahitau na-omo

✧ **12:16:** Nao 25:29-34. ✧ **12:17:** Nao 27:30-40. ✧ **12:18-19:** NiT 19:16-20; VV 4:11-12; NiT 20:18-21; VV 5:22-27.

oya taina wayahina ka mini,
 akanai nau-wawanimi
 hanu wayahia unau-vi-anigi.
 Wayahina, aituhu aitam onoto na-omo
 oya taina wayahina, e na-vo-dadani,
 akanai ami veimea
 ututu-hanuhanui aitamoata deina.”☆

²¹ Vona ahiahina, oya-nana pai matauta kai-wadi, ka Mosesese kadu matamatauta, e ivona deinake, ivona,

“Yau matauta wayahina atatatava.”☆

²² Kate itomi eha pai matauta deina wayahina ut'-omo. Eha. Itomi avaha uomo Oya Sioni wayahina, vivane Yaubada Yawayawaina ya meagai. Kana-vona papani-nana ana wava Ierusalem wahuma wayahina, ka papani-nana wayahina anelose habu-vainei imamaei, inau-hohona, ka idewa-haiawa. ²³ Ka kadu avaha uomo pai nau-hohona Yaubada natunatuna wayahia. Yaubada avaha tau habuhabui ai wava ginumi wahuma. Tau habuhabui Unu-tauna nihenina imamaei. Ka kadu avaha uomo Yaubada wayahina. Tauna tomotau habuhabuka yaka tau vaneneha. Ka kadu itomi avaha uomo tomotau tunutunuhi nuai ahihinata wayahia. Nonova tau tau tunutunuhi tanopia, ka tuta ataina wayahina aviani Yaubada ya nuanua wayahi ivaniaha-yehai wahuma. ²⁴ Ka kadu itomi avaha uomo Iesu wayahina. Tauna awaeha

☆ **12:20:** NiT 19:12-13. ☆ **12:21:** VV 9:19.

vovouna a tau am-venena. Ka avaha uomo tauna dayahina wayahina. Ka dayaha-nana onoto ahiahina dayahina. Nonova Abeli onoto ahiahina. Ka avaha vaneina nau-vi-anigi, Abeli dayahina Yaubada vi-honei tano-nana wayahina, ka dayahina Yaubada hidehidei Abeli ya tau nau-vi-aniga yana dewa goyona nau-patei dewa-yaiyai wayahina.

Kate Iesu dayahina Yaubada vi-honei, hidehidei tauna yaka dewa goyona na-nua-piahi. Ka Yaubada avaha awaehei deina. Wayahina kadueyei, Iesu dayahina Abeli dayahina vane-tawanei. Iuna vona-dabadaba vovouna yawai-vavaha wayahina.*²⁵ Wayahina, nau-wawanimi udune-vivinimi. Eha tau vona wahuma yana ipupu uvihahaie. Nonova me Isiraeli tupwai Mosese yana vona ivihahaiei. Tauna tanopi ana heta wayahina mamaei, ka tauna Yaubada vaneana ahihinata haehaeyei, kate tomotau eha yai nuanua. Ka munia, tau eha ai pata inovotawane. Yaubada habuhabui vita-vovoni akanai. Wayahina, aituhi aviyaivia wayahikaia vonana wahuma wayahina ivihahaiei, tau ai dewa-yaiyai medeina? Dewa-yaiyai ani-vainena akanai.*²⁶ Tuta nonova wayahina, Yaubada movina tanopi ana heta nau-yueyuei. Ka tauna avaha vona-dabadaba dewana wayahina, ivona,

“Apaina kadu aitam tuta wayahina tanopi ka wahuma ainua anau-yueyuei.”*

* 12:24: Ebe 8:6; Nao 4:10. * 12:25: Ebe 2:1-3; 10:26-29.

* 12:26: Aga 2:6.

27 Vonana “kadu aitam tuta wayahina” voneka aituhu aviani ana pata nau-yueyue dewa habuhabui tauna naona vevewanei wayahia, akanai, dewaia habuhabui imaiova. Wayahina, munia avi dewa imamaei, akanai kana-vona eha ana pata dewaia inau-yueyue.

28 Ka Yaubada ya nuanua tauna ya pai veimeana na-veneka kavaniahei, ka eha ana pata ya pai veimeana nau-yueyue. Iuna pai veimeana na-ma'-vavaha. Wayahina, nau-wawanika nuaka nihenina Yaubada kanau-kaiwei, kadu nau-wawanika kan'-awa-davei tauna ya nuanua deina, vivane yaka nua-opu wayahikaia kan'-apa-vidovidohei. 29 Ka aituhu aviani eha ma'-vavaha, apaina tauna na-vita-vovoni. Iuna yaka Yaubada yana dewa ai yabeyabena deina.✧

13

Medeina Yaubada Kavo-vi-dewa-haiawi?

1 Itomi tau ekalesia nau-wawanimi udune-nuanuaiemi, iuna Kauvea ya nuanua deina a tau vi-muni-waiwai wayahika. 2 Ka kadu nau-wawanimi tau bwanibwani unau-kaiwei, kadu udune-nuanuaiei. Nonova tupwai tomotau idedewei deina, ka tau bwanibwania eha tomotau, kate tau vivane anelose. Kate tau vi-meagai-naia eha it'-anamane.✧ 3 Ka kadu yaiami manua yohona nihenina imamaei unuanuani, itomi nui manua yohona nihenina deina. Ka yaiami yai ma' vitana unuanuani, itomi uviviha aitamoata deina.

✧ 12:29: VV 4:24; 9:3. ✧ 13:2: Rom 12:13; Nao 18:1-8; 19:1-3.

4 Habuhabumi nau-wawanimi tavine a veimea uvi-ateteyei ka eha uvona-opuopue. Ka habuhabumi onoto ka vavine ami inua nau-wawanimi kenene uvihahaiei a itoava yawayawaimi wayahina. Aituhu aviyaivia ivi-tau kenekenene, o aituhu aviyaivia ivi-tau gema, apaina Yaubada tomotau na-nau-yanahi, ka kadu ai dewa-yaiyai vi-nua-dadani, na-venei ivaniahei.✧

5 Ka kadu nau-wawanimi udune-vivini ka eha un'-awaehemi kina nuami epepe. Ka nau-wawanimi aviani wayahimia, akanai udewa-haiawa wayahina deina. Iuna Yaubada avaha vonei, ivona,

“Yauke taua eha ani-tawanem.

Eha am heta ana-novo-tawanem.”✧

6 Wayahina, yaka ate-vatu wayahikaia kana-vona,

“Kauvea vivane au tau ivaita-hoina.

Wayahina, eha amatamatauta.

Avi dewa goyona tomotau ai pata idedeweyeu?

Eha aitam aviani.”✧

7 Yami tau eta-naonao tuta nonova wayahina unuani. Iuna nonova tau i Yaubada yana vona ivi-wavenemi. Wayahina, nau-wawanimi tau i yawai kadu yai aniga unuani, kadu tau i yai vitumahana udewa-v'-iunei.✧

8 Iesu Tau Ito-yavuha eha vo-vinevine. Tuta nonova wayahina, kadu tuta ataina wayahina,

✧ 13:4: Epe 5:5. ✧ 13:5: VV 31:6, 8; Ios 1:5. ✧ 13:6: Sam 118:6. ✧ 13:7: 1Ko 4:16.

kadu tuta tepakaia wayahina, tauna aitamoata. Ka ya viwavenena kadu aitamoata, eha ta-vo-vinevine. ⁹ Wayahina, nau-wawanimi udune-vivinimi, ka eha viwavenena tunina tunina ivin'-omo-nananena un'-awaehe ieta-naoemi uvi-tau panipani Yaubada ya etawana tunutunuhina wayahina. Iuna aituhu nuaka nihenina bagibagi Yaubada yan' am-venena awawaehina wayahina kavaniahei, akanai itoka tau ekalesia kavidoha deina. Ka aituhu veimea tunina tunina aniani wayahi kavi-ateteyei, dewaia eha ai pata nuaka ina-ivaite ividoha. Vona ahiahina, tomotau tuta nonova wayahina a itoava tuta ataina wayahina veimeaia ivi-ateteyei eha ita-vidoha deina.*

¹⁰ Mosese yana tuta wayahina a itoava tuta ataina wayahina, tau vi-nomu vi-nomu a pai vi-ai wayahina ipaipaisewa Ine Vito-pota o kadi Manua Vito-pota nihenina. Ka Yaubada tau vi-nomuia awaehei vi-nomuia tupwai ai vo-pata ianiana. Kate itoka yaka pai vi-ai vovouna tunina. Ka tau vi-nomu tutuai eha ai pata nui kan'-ania. ¹¹ Vona ahiahina, auyewa aitamoata wayahina ponimana aitamoata aitamoata nihe-
nia, tau vi-nomu anani vahitau dayahi iomaomanei Pai Vi-ai Vito-pota-vainena nihenina dewa goyona a nau-pata wayahina, kate avi vahitau ivunui, wagana ibou n'-anai papani mavununa meagai an' awa nini-vanina wayahina.* ¹² Ka Iesu kadu meagai an' awa nini-vanina viha ananina vaniahei, ka kavi-tau ahihikata dayahina

* 13:9: Rom 14:17. * 13:11: Lev 16:27.

wayahina.✧ 13 Wayahina, itoka nau-wawanika kan'-omo tauna wayahina meagai nini-vanina wayahina, ka avi pai ini-yauyau tauna vaniahei, itoka nau-wawanika kan'-awaehei ini-yauyau kavaniahei aitamoata deina.✧ 14 Nau-wawanika kan'-omo tauna wayahina meagai nini-vanina wayahina. Iuna tanopia eha aitam yaka meagai na-ma'-vavaha. Wayahina, itoka meagai na-ma'-vavaha na-omo kapotepotei.✧ 15 Ka itoka nau-wawanika tutu tuta wayahina Yaubada kan'-awa-davedavei. Ka aituhu kan'-awaehei Iesu vivane yaka Kauvea, akanai nau-wawanika tauna ana wava katomatmani mani tomotau wayahia deina. Ka avi tuta dewana kad-edewei, Yaubada kawa-davedavei deina.✧ 16 Ka kadu nau-wawanimi dewa ahiahina udedewei wayahimia, kadu nau-wawanimi yami gugua mani tomotau uvo-patai. Iuna aituhu avi tuta am-venena-kavovo kaveneveneinei deina, vona ahiahina, Yaubada kavo-vi-dewa-haiawi.✧

17 Itomi nau-wawanimi yami tau eta-naonao uvi-ateteyei, kadu nau-wawanimi un'-awaehei tau yai veimea uvi-munie. Nau-wawanimi udedewei deina, iuna tau yai paisewa nuami idune-vi-avini. Ka apaina tau nau-wawani yai paisewana wayahina Yaubada ya vi-tanai ivona-nau-patai. Wayahina, aituhu yai veimea uvi-ateteyei, akanai yai paisewa uvo-vi-meani, e tau yai dewa-haiawa wayahia ipaipaisewa. Ka itomi kadu uvidoha deina. Kate aituhu yai veimea uvihahaiei, yai paisewa uvitevitei, ka

✧ 13:12: Ioni 19:17. ✧ 13:13: Ebe 12:2. ✧ 13:14: Ebe 11:10, 16; 12:22. ✧ 13:15: Sam 50:14, 23. ✧ 13:16: Pili 4:18.

itomi yawaimi uvi-goyogoyoi deina.✧

18 Yama nuanua uviama wayahiai. Itoai anamaneai am' ayaunena hadahadanina. Iuna tuta tuta yama nuanua ananina dewa tunutunuhina ana noe adedewei.✧ 19 Ka yauke yau nuanua ananina uviama Yaubada n'-awaeheu tuta eha ani-hoina na-iakwa wayahina au pata amavina wayahimia.

Viama Pai Nau-yehata

20 Nua gomagomanina omo Yaubada wayahina, ka tauna yaka Kauvea Iesu omane-havinei anigea. Ka Iesu dayahina wayahina Yaubada awaeha ma'-vavaha vevewanei wayahika. Wayahina, itoka Yaubada yana sipiV deina, ka yaka Tau Dune-vi-avina Ananina vivane Kauvea Iesu.✧ 21 Ka yau viama wayahimi vivane Yaubada dewa ahiahina habuhabuna na-venemi na-vo-vi-aiami, e yami nuanua movina uvi-ateteyei. Ka aviani Yaubada ya nuanua wayahimi ka aviani na-vo-vi-dewa-haiawi, yau viama vivane tauna dewaia paipaisewei nihenimia Iesu Tau Ito-yavuha wayahina. Ka Iesu nau-wawani didigana ma'-vavaha na-vaniahei. Ana pata deina.

Vona Pai Nau-yehata

22 Yaiau, yami leta taina vivane kutakutana, ka aginumi omomo wayahimia, iuna yau nuanua ate-vatu uvaniahei nihenina. Ka kadu aviamemi yau vona panina leta taina nihenina unononi, e un'-awaehei aitamoata.

✧ 13:17: 1Te 5:12. ✧ 13:18: Dew 24:16; 2Ko 1:12. ✧ 13:20: Ier 32:40; Ese 37:26; 1Pi 2:25.

²³ Kadu yau nuanua aka niam Timoti vaneana taina unononi. Tauna a havia avaha manua yohona wayahina iyavuhi. Wayahina, aituhi tauna ana pata vo-kwayavonina na-omoi baina wayahiua, e avi tuta anau-vi-taumi, tauna nui an^l-omo wayahimia.

²⁴ Yama nau-kaiwa ava-tawanei omomo it-omi yami tau eta-naonao habuhabui wayahia, kadu Yaubada ya tomotau habuhabui wayahia. Ka tau ekalesia baina papani Itali imamaei yai nau-kaiwa iva-tawanei iomomo wayahimia.

²⁵ Yau nuanua pai nau-yehata Yaubada tauna yan^l am-venena awawaehina na-venemi, uvani-ahei, unua-vi-avini. Ana pata deina.

Awaeha Vovouna Minaveha Movia
The New Testament in the Minaveha Language of
Papua New Guinea
Nupela Testamen long tokples Minaveha long Niugini
copyright © 2008 Wycliffe Bible Translators, Inc.

Language: Minaveha

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-04-23

PDF generated using Haiola and XeLaTeX on 11 Nov 2022 from source files dated 9 Oct 2020
b67aeef-7e9d-566a-9ff5-cb22ab7e2ea4